

सानसेयारि "बड'सा" खीरलाइयाव समाजयारि जिज्जो लोळा थानाय रायथाय, रनथाय, भल, सल'बाथा आरु दावबायारि थावनि, पार्क बाइदिनि सायाव लिन्नाय लिखिबां दैथाय हर/ सानसेयारि "बड'सा" खीरलाइया सेबखानानै फोसावणोन।

बड'सायाव लिन्नाययनि हुद्दा खालाम, "बड'सा" खीर नौथो, जो बयबो आंगो खालाम।

सानसेयारि बड'सा मावखुलि  
माइबं नोगार, जोहोलाव देमालु लामा  
कक्राझार, बिटिमि-783370  
Website: www.bodosanewspaper.com

# सानसेयारि बड'सा



BODOSA ★ A Bodo News Daily ★ Friday ★ 23 July, 2021 Kokrajhar, BTC, Assam ★ Vol.- 31, Issue No. 118 ★ R.N.I.Regd.No.40994/91, AssamGovt.Regd.No.IPRD.40/2006/13, ★ Rs.8/-

ए पि एस सि  
खेलेंखारिनि  
गाहाय दायनिगिरि  
राकेश पालआ  
जामिन मोनबाय

## एम बाथाजों लोगोसे एन एल एफ बिनि सा 23 दैदेनगिरि आरो सोद्रोमाफोरा गोजोन बोहैथियाव फैफिनानै आखाइ दैखांबाय बर' हारिनि गेजेराव हाथियार उदां समाज फैफिन्नायाव खुसिनि दोहौ



गुवाहाटी, 22 जुलाइ: आसाम सुबुं सिबिथाय आयग एबा ए पि एस सि साखि थिसन्थाय आजादनि खेलेंखारिनि गाहाय दायनिगिरि राकेश पालआ आसामनि जरखा बिजिरसालिन्फ्राय जामिन मोनबाय। बिथाड जामिनयाव जोबथेसालिन्फ्राय उदां जासिगोन। आइ पि सिनि 420 सेक्सन आरो प्रेभेन्सन अफ कारबसन अफ एक्टनि सेक्सन 7 आरो 13 (बि) नि सिडव (□ 5 बिलाइआव)

माजबात, 22 जुलाइ: थानाय 2019 माइथायनि 19 जानुवारीखलि एन डि एफ बिनि मोनब्रेबो हान्जाया भारत सरकारजों गोजोन गोरोबथानि थाखाय गुबै दाहाराव गिदिबोफिनानै 2020 माइथायनि 27 जानुवारीखलि बर'फोरनि थामथि जारिमिनारि गोजोन गोरोबथा थामहिनबा बि टि आर गोरोबथाया जानानै थानायनि उनाव माखासे गोरोन्थि बुजिनयनि जाहोनयाव बि टि आर आव एम बाथानि दैदेन्यायाव फिन गोदानै जोनोम मोन्दोमोन एन एल एफ बि मुनि हाथियार दैग्रा मोनसे गोदान बिग्रायारि हान्जा। हारिनि



इयुनखौ सानानै लोगोसे बर' हारिनि गेजेराव हाथियार उदां समाज दानायनि थाखाय हारिनि

माखासे दैदेनगिरिफोरनि गले- गले खावलायनाय आरो बि टि

आर-आसाम सरकारनि मोन्नाय एन एल एफ बि नाजानायजों गोदानै जोनोम

हान्जानि दैदेनगिरि

सोद्रोमाफोराबो हारिनि फारसे इयुनखौ सानखांफिनानै दिने

गोजोन दाहाराव फैफिनबाय। हाग्रानिफ्राय ओंखारबोना गोजोन दाहाराव फैफिनानै दिने उदालगुरि जिल्लानि माजबात थानानि सिडव थानाय लालपानि पुलिस थानाय सरकारनि खाथियाव गावसोरजों लोगोसे गं 4 ए के-47 सिरिज राइफल, गं थाम आखाइजों बानायनाय राइफल आरो गुबुन गोबां मुवा-बेसादफोरखौ गथानानै होयो। एन एल एफ बिनि आमि चिफ एम बाथानि दैदेन्यायाव हान्जानि आफादगिरि बुथिगोरा आरो लेडइ आमि चिफ बक' बसुमतारोजों (□ 5 बिलाइआव)

### केबिनेट जथुमनि गेजेरजों माखासे गोनांथार बिथांखिफोरखौ लादों राइज्यो सरकारा

गुवाहाटी, 22 जुलाइ: आसाम आइन आफादनि बाजेत जथुमआ सोलिबाय थानाय समनि गेजेरजों नो दिने बृहस्पतिबारखलि गिबि मन्थि ड० हिमन्त बिश्व शर्मानि दैदेन्यायाव राइज्यो केबिनेटनि मोनसे गोनांथार जथुमआ जानानै थाडे। बे केबिनेट जथुमयाव सरकारा माखासे गोनांथार बिथांखिफोरखौ आजावनानै लानाय जादों। जाय बिथांखिफोरखौ सरकारा मावफुनो थाखाय आखायाव लादों। दिनेनि बे केबिनेट



जथुमयाव लानाय गाहाय थांखिफोरनि गेजेराव दं फारिये-पि एम-किसान बिथांखिनि आवथायाव फरेस्ट राइट एक्टनि सिडव गोलैनाय हानि पाट्टा

मोनो हाथाव आबादारिफोर, बोसोरारि पाट्टा थानाय आबादारिफोर, थौजि पाट्टा (□ 5 बिलाइआव)

### सुबुंफोरनि हान्था-मेला राहानि थाखाय लामा लुफुंथायफोरनि खामानिखौ थिखानाय समसिमाव फोजोबनो गिबि मन्थिनि बिथोन

दिसपुर, 22 जुलाइ: आसामनि गिबि मन्थि ड० हिमन्त बिश्व शर्माआ दिने पि डाब्लिड डि कनभेन्सन सेन्टराव पि डाब्लिड डि (लामा) नि गासै इ रि ज क उ टि थ इन्जिनियारफोरखौ लानानै राइज्योनि गुबुन गुबुन जायगाफोरग लामा बिथांखि मावफुंसासिनो थानाय आयदानि सायाव मेल जथुमनायनि गेजेरजों खोरं लादों। बे मेलनि



गेजेरजों गिबि मन्थि शर्माआ राइज्योनि गेजेराव मावफुंनाय लामा लुफुंथाय खामानिफोरा आद्रा जानानै थानायफोरखौ थिखानाय समनि गेजेराव फोजोबनो थाखाय इन्जिनियारफोरखौ बिथोन होयो। राइज्योनि गासै पि डाब्लिड डि जिभिजननि सिडव (□ 5 बिलाइआव)

### तामुलपुरनि खौरां लाइनि एजेन्ट बासुदेब दासखौ गोबां आफाद, गौथुमफोरा बरायदों


तामुलपुर, 22 जुलाइ: थानाय 1985 माइथायनिफ्राय लान्थिये गिदिरि तामुलपुर ओन्सोलाव खौरां लाइनि एजेन्टिनि गेजेरजों आसामनि खौरां बिथिडव आरो तामुलपुर ओन्सोलाव समाजगिरि जिउआव जरखा बिहोमा होबोनाय कृष्ण भास्डार एन्ड बुक स्टलनि बिगोमा बासुदेब दासजों लोहोसे बिथानि बिसिखौ थानाय बुधबारखलि दुलाराय आसाम फरायसा आफादनि सोलेंथाइ नेहाथारि भबजित बेजबरुवा आरो दुलाराय आसाम खौरांगिरि (□ 5 बिलाइआव)

### चन्दन ब्रह्मनि खोथा होनाया मोकथां महर मोनासै

### सुबनखाता राज्योयारि देहा फाहामसालिया 17 बोसोरसिम अन्थाइ खम्फायैनो थालांबाय

मुसलपुर, 22 जुलाइ: जाय समाव सार्वसिम खोन्डोआव गोदान-गोदान बिथांखिफोरखौ गायसन्नाय जाफुंसारनो हादों होन्ना फोसावदिबाय थादों बे समावनो फाहामथायनि आंखालाव सरसनस्रा राइजो-राजाफोरा गोबां जेनाजों मोगा-मोगि जानो गोनां जादों। सार्वसिम बिफाननि गोहैलो आखुनि थाखाय थानाय 16 बोसोरसिम अन्थाय खाम्फायैनो थालांबाय सुबनखाता राज्योयारि देहा फाहामसालिया। गाहाम फाहामथायनिफ्राय जानागाराव थानादों बाक्सा जिल्लानि भारत-भुटान सिमा ओन्सोलनि राइजो-राजाफोरा। 80 जिथायाव बे ओन्सोलाव गंसे राज्योयारि देहा फाहामसालि गायसन्नाय जादोंमोन। नाथाय बे गिदिरि ओन्सोलनि राइजो-राजाफोरखौ बेंखना लानो हायाखे बे गंसेल' देहा फाहामसालिया। जाउनाव सरसनस्रा बेराम- (□ 5 बिलाइआव)

### बाक्सा जिल्ला बरमाखौ रोजा रोजा दावब 'फोरा समायहोदों



बाक्सा, 22 जुलाइ: बाक्सा जिल्लानि बरमानि सान्जा स'कआव थानाय औवाबारियाव रोजा रोजा दावब 'फोरा जिराय फेनाया मिथिंगा अनपावरि सुबुंफोरनि गोसोआव रंजाखानाय लाबोदों। मख 'नो गोनादि मिथिमोने जायगानिफ्राय फेनाय गुबुन जोलैनि बे दावब 'फोरा बोसोरफोमबो फेनाय बरमानि सान्जा स'कआव थानाय ओन्सोलनि सुबुंफोरनि औवाबारियाव जिरायफेयो। 31 नं माहारियारि राजा लामानि साखाथिनि औवाबारियाव थानाय रोजा-रोजा दावब 'फोरा ओन्सोलखौनो समायहोदों। लामा हान्थिया सुबुंफोरा लामा-सामा थाद 'नानै (□ 5 बिलाइआव)

### गोदानै बिबान मोन्नाय गसाइगाव महकुमा बेंगिरि राहुल कुमार गुप्ताखौ बरायदों



गसाइगाव, 22 जुलाइ: आसाम सरकारा थानाय 17 जुलाइखलि राइज्योनि गुबुन गुबुन जिल्ला आरो महकुमा बेंगिरिफोरखौ सोलाय-सोल' खालामनायनि मोनसे बिथोनलाइ फोसावनाय बायदिये कक्राझार जिल्लानि सिडव

थानाय गसाइगाव महकुमानि गोदान महकुमा बेंगिरि महरै बिबान रुजुनफेदों राहुल कुमार गुप्ताआ। एरैहाय गसाइगाव महकुमानि आगुनि महकुमा बेंगिरि पल्लबि सरकारआ हाइलाकान्दि जिल्लानि उफ्रा जिल्ला बेंगिरि महरै दैथाय

हरजाबाय। सनितपुर जिल्लानि उफ्रा जिल्ला बेंगिरिनिफ्राय गसाइगाव महकुमा बेंगिरि महरै गोदानै बिबान रुजुनफेनाय बिथां राहुल कुमार गुप्ताखौ दिने महकुमा बेंगिरिनि मावखुलियाव मोनसे हाबाफारि खुंनयनि (□ 5 बिलाइआव)

### अरायथा सारि थिसनांगोनि दाबिजों दुलाराइ आसाम साफाइ कर्मि आफादआ रांस्वान्थि मन्थिनिसिम गोसोखां बिलाइ दैथायहरदों

कक्राझार, 22 जुलाइ: थानाय बोसोर 2020 माइथायनिफ्रायनो दुलाराइ मुलुग नाडे कभिड-19 नि सागलोबनायाव भारत हादतआवबो गासै बिथिडव बेंगुरा खालामदों। मख 'जाथावदि, आसाम सरकारनि देहा बिफानआ कभिड-19 नि सेथि दोहोनि समनिफ्रायनो राइज्योनि दाब-दाब जायगाफोरग क्वारेन्टाइन सेन्टर फसदोंमोन आरो बे सेन्टरफोरखौ साखोन-सिखोन लाखिनो थाखाय गोबांथार साफाइ कर्मि एबा मावफारियाफोर थिसन्नाय जादोंमोन। राइज्यो नाडे देहा बिफानआ गासै सा 1326

साफाइ कर्मिफोरखौ राइज्योनि दाब-दाब जिल्लाफोराव थानाय क्वारेन्टाइन सेन्टरफोराव थिसन्दों। खामानियाव थिसनजानाय बिसोर साफाइ कर्मिफोरा गावसोरखौ देहा बिफाननि आवथायाव साफाइ कर्मि हिसाबेनो अरायथा साखियाव थिसननांगोनि थाखाय सरकारनि खाथियाव दाबि दैखादों। बेनि असिलायैनो दुलाराइ आसाम साफाइ कर्मि (□ 5 बिलाइआव)

### पुलिसआ तामुलपुरआव सासे नंखाय एम बि वि एस देहा फाहामगिरिखौ खादों



तामुलपुर, 22 जुलाइ: बाक्सा जिल्लानि तामुलपुर महकुमानि कुमारिकाता पुलिस थानानि सिडव थानाय कुमारिकाता हाथयनि नारायण मेडिकल स्टर एन्ड आस्था क्लिनिकल लेब'रेटरी मुनि गंसे फार्मासिनफ्राय सासे नंखाय एम बि वि एस देहा फाहामगिरिखौ हमदों। मिथिनो मोन्नाय बादिबला तामुलपुर महकुमा बेंगिरि मावख 'नि इ ए सि उत्तम थाकुरियाआ दिने मोनसे हाबाफारि लानानै कुमारिकाता हाथायाव थानाय (□ 5 बिलाइआव)

### गौरां दैसानि हा खुरखानायाव जिंगा सिनो गोनां जादों कक्राझार बरुवापारा ओन्सोलनि थागिबि सुबुंफोरा

कक्राझार, 22 जुलाइ: सोलिफु आसाम सरकारा राइज्योनि दाब-दाब जिल्लाफोराव दैसा-दैसाफोरनि दै बाना सोमजिनय आरो हा खुरखानायखौ होबथानयनि थाखाय बायदि रोखोमनि बान्दो, दै दानागारा जाफै-नाला लुफुंबाय थानाय समनि गेजेरावनो कक्राझार सहरनि खोला फारसे 5



कि:मि: सो जान्थायाव थानाय बरुवापारा ओन्सोलनि थागिबि सुबुंफोरा गौरां दैसानि हा

खुरखानायाव जिंगासिनो गोनां जादों। मख 'जाथावदि, बोसोरफोमबो दैज्जां बोथोरनि (□ 5 बिलाइआव)

# सुजुगिरिनि खोलोम

लाइमोन बैसोआनो गोगो नोगोरारि दानायनि सम

आग्ला, गोदो गोदायनि होन्नाय फैलिया, संसारनि खैरोम दैरोम थासारियाव थावरिबोनाय साफ्रोम सुबुंफोरनि गोबोआवनो दंसै आथिखाल मुगानि रोंगथि आरो मोन्दाथिया। गिदिर-उन्दै मान सनमाननि बिथिडव फारागथि लाखिनो आवबा आवबा थालानाय समाजआव नाथाय धोनि गोरिब, जाम्बा दुखि रेंनाय रोडैनि गिदिर उन्दैनि फारागथि लाबोनाया जैरै बांबोदों गुबुन बिथिडै समाजआरि गाजि हृदाफ्राबो बांबोने लादों। गावजों गावनि अनज्जायनायाबो सानफा एफा सुजुग सुबिधाखौ बिथा खालामनानै सोलिनो लानाय एंगारो हायै सैथोथिनि महर लादों। जाउनाव समाजआरि जिउ खुंनय लामायाव मोन्दस' हायै खहा लाबोदों।

सुबुं समाजआव लाइमोन बैसोनि इयुन दाफुंनयानो जिउनि गोमो गोथां जाइखलं सिमांजों रन्साय जानाय। लाइमोन बुब्बियानो गावखौ सासे गोगो गेवलांसार ओंथि गोनां नोगोरारि दाना लानायनि थि सम। समाव बे खाबुखौ एरेंनो हगारद्लाहरोब्ला गोमो गोथां इयुन जिउआ हांमा हांसायाव गफाबनानै उन दाहायाव गोजावलांनगोन। नाथाय दुखुनि बाथ्रादि मोनथिखानानेब्लाबो खाइफा लाइमोन जिउखौ थांखि गैयै खालामनानै लानायाव जिउनि लामाया खोमसि जालानायजों लोगोसे समाजनि बारहावाखौबो गुबुंले खालामनो लादों।

आथिखालाव लाइमोन समाजनि गोबां सोद्रोमाफ्रानो बिषनि निसा गोनां ड्रगस न'खर आरो न'खरनि सुबुंफोरखौ आन्दोआव दोन्नानै लाखोमानाय हृदाफ्रा समाजखौ सिलिंखार खालामनानै जुब्रा खालामनो लादोंसै। बिषो गोनां ड्रगस लानायजों लोगोसे अबैध जाथाय बिजाथायजों गिखंथाव महरनि एडस आइ भि, एडसफोरबायदि बेरामनि मैहुर जानानायबो गामामा बयनिबो नोजोरावसै। गुबुन फारसे लाइमोन समनि गुदि हाबानिफ्राय दोरोतनानै आलादिडा जिउ खुंनयनि लामा होसोनायाव सोलौंथाय बिथिडवबो ओन्सोल लायै ओन्सोलसोलौंथायनि थासारिया गुनजेर अरनो लादों। जाउनाव मान होनाय, अनज्जायनाय, अनसायनाय, गोगो थासारि गासै बिथिडवनो आंखालनि बाहा लादों। बेफोर गासै जेंनानि आंखालखौ फोलोमनो समाजआनो थोजासे नड। दा आरो इयुनखौ गोगोयै दाफुंनो गासै थाखो आफाद, गौथुम आरो बाइदिसिना फसथानफ्रानो बेनि सायाव गिलित बिबान रुजुननांगोन।

# दिनेनि फानजामुथि

**राशि बाइदियै मुनि गिबि हांखो**  
 मेष : अ ल वृष : ऊ ब (उ ए इ) मिथुन : क छ (ङ ष) कर्कट : ड ह सिंह : म ट कन्या : प ठ (ण ष) तुला : त र बृश्चक : ब न धनु : ध भ (ढ फ) मकर : ख ज कुम्भ : ग श (स) मीन : द च (ख ज झ)

- मेष:** राज सालायनायाव गिखंनय मोनखानो हागौ। गोसोखौ लोरबां खालामनो नाड।
- वृष:** जेखि जाया बेरामफ्राव गोरलैबायनो हागौ। देहाखौ साखोन-सिखोन लाखिनगोन।
- मिथुन:** मोजां सुबुंजों लोगोथि जालायनानै थानो हागोन। गोसोआ गोजोन्नयजों उसिफावगोन।
- कर्कट:** गोसो थोलायनायनि बान्दोया गोर जागोन। गोजोन्नयजों समखौ हगार हरनो हागोन। मोजां सान।
- सिंह:** जेखि साना खामानिया जाफुंनय नड। मोजां खामानियाव आगान होनो नाड। गोसोखौ हमथा।
- कन्या:** माखौबा लानानै गिनाय सोमजिखानो हागौ। लोरबां गोसो लानो नाड। जेखि जाया नाजानांगोन।
- तुला:** देहाआ लोरबां जालानो हागौ। गावनो गाव देहाखौ मोजाडै जेथोनै लाखिनाया मोजां।
- बृश्चक:** नख'राव असांथि सोमजिनो हागौ। गोजोन्नय गैयैजों समखौ हगार हरनगोन।
- धनु:** बादायनायाव देहसास जानो हागोन। गोसोनि सानायखौ जाफुंसार होनो हागोन। मोजां सान।
- मकर:** सोरजोंबा बेरेखा-बेरिखि जालायफ्रानो हागौ। गोसो हमथानानै सोलिनो नाजानांगोन।
- कुम्भ:** जेखि मावा फालांगिआव आय खालामनो हागोन। रंखावरि बुधुमनानै लानो हागोन।
- मीन:** रावजोंबो जेंना गैयै सांथियै थानो हागोन। फारफ्रोमथिबो जौगानाय फेगोन। मोजां सान।

# 25 जुलाइयाव हाइकमानआ जा थांखि लागोन बेखौनो गनायगोन : गिबि मन्थि बिएस येदियुरप्पा



**बेंगलुरु, 22 जुलाइ :** कर्नाटक आब खनसे बाव राजखान्थियारि फावथिना जागायनायनि इसारा मोन्नाय जादों। राइज्योआव सामलायगिरिखौ सोलायनायनि सायाव सावरायनायाव गिबि मन्थि बिएस येदियुरप्पाया बुंदोंदि, बिजेपि हाइ कामाननि फारसैनिफ्राय 25 जुलाइयाव थांखि लानाय जागोन आरो थांखिया जेखि जाया मानो गाव बेखौ गनायगोन। बिएसआ बुंबावोदि, राइज्योआव 26 जुलाइआव गावसिनि सरकारा 2 बोसोर फुरा जागोन। बे खाबुआव मोनसे फिसा हाबाफारि खुंनय जागोन। बेनि उनाव हारिमायारि आफादगिरि जेपो नडुया बाथ्राखौ बुंगोन गाव बेखौबो गनायना फालिगोन। बिजेपिखौ खुंथायाव लाबोफिन्नाया गावनि बिबान। पाटिनि मावसुमाफोर आरो गावनि लोगो दैदेनगिरिफोरनाव बेखौबो खावलायोदि बे मिसनआव गावजों लोगोसे थायो आरो हेफाजाब होयो। बिएस येदियुरप्पानि बिबुंथि होनायजों बै बिजेपिनि सेन्ट्रल लिडारसिपआ राइज्योआव सामलायगिरि सोलायनाय लाबोनानि सायाव सावरायज्जायदों होन्नाय बाथ्राया नंगौ फोरमान जादों। थांनय माखासे दानफोरनिफ्रायनो कर्नाटकआव एमएलएफोरनि मोनसे हान्जा आरो येदियुरप्पानि गेजेराव दावराव-दावसि जानायनि खौरां मोन्दोंमोन। माखासे दैदेनगिरिफोरा दिल्लीयाव थानानै गिबि मन्थि येदियुरप्पानि सोमोन्दै सेन्ट्रल लिडारसिपजों सावरायदोंमोन। बेनिफ्रायनो गोबां बाथ्राफोरखौ हमदानानै लानाय जादोंमोन, नाथाय येदियुरप्पानि बिबुंथि होनायनिफ्राय बेयो रोखा जाबायदि कर्नाटकआव मोनसे गिदिर राजखान्थिआरि सोलाय सल' जानो नागिरदों।

# केप्टेन अमरिन्दरनि हेफाजाबगिरिफोरा सिद्धुनि थाखाय खामानि मावदों



**गोदान दिल्ली, 22 जुलाइ :** राजखान्थियाव जेबो अरायथा नड। माब्ला सोरनि आखायाव फेगोन आरो माब्ला सोरनिबा आखायनिफ्राय खुंथाया थंगोन, बेफोर गासैखौबो राजखान्थिनि थासारिफोरा थि खालामो। बे बायदिनो पान्जाबनि राजखान्थियाव नुनो मोन्नाय जादों। जेराव मोनसे समाव केप्टेन अमरिन्दर सिंखौ सेलुट खालामोमोन, आथिखालाव बिसोरनो नबजित सिं सिद्धुजों लोगो जाना आखाय खबदों। पान्जाब कंग्रेसआ दावराव-दावसिनि खौरांफोरनि गेजेराव सोलाय सल' जानायखौ नुनो मोन्दों। राजखान्थियारि जरखाफोरनि बादिब्ला, मोनसे समाव केप्टेन अमरिन्दर सिंनि मुनि समायखिरा लायोमोन, आथिखालाव बिसोरनि बिनि हें थायै उदाडै बाथ्रा बुंदों। जायफोरा मोनसे समाव केप्टेन फारसै गावसिनि फोथायनायखौ दिन्थिनानै 2015 आव प्रताप सिं बाजवाखौ पान्जाब राइज्यो कंग्रेस कर्मिटीआव आफादगिरि मासिनिफ्राय बोखलायनो गोखों नाजादोंमोनफ आथिखालाव बिसोरनो नबजित सिं सिद्धुनि थाखाय केप्टेननि बेरेखायै उदाडै ओंखारनानै बाथ्रा बुंदों। कंग्रेसनि दैदेनगिरि तप्त राजिन्दर बजवा सुखजिन्दर रन्थावा आरो सुखबिन्दर सरकारिया मोनह। आथिखालाव नबजित सिं सिद्धुनि थाखाय गिबि मन्थि अमरिन्दर सिंखौ जेंनायाव खोलैनो गोखों नाजादों। बिसोर दैदेनगिरि राजखान्थिनि रोंघाथिजों बेनि सोलोखौ दिन्थिनानै गावसिनि पाटिखौ सिद्धुआ खुंथायाव लाखिनो हागोन सान्ना बिखौ हेफाजाब होदों। रंखांथि जरखाफोरा एवा बिजिरिगिरिफोरा बुंबावदोंदि, नबजित सिं सिद्धुखौ गाहाय महरै थिसननायजों राइज्योनि पाटिआव जेंना सुप्रानाय जानाय नड, बेयो गोबाव समनि दावहानि जागायजेन्नाय जानो हागौ। गुबुन फारसैथि माखासे सुबुंफोरनि बादिब्ला, पिसिसिनि गाहाय महरै सिद्धुखौ गाहायाव खोख्लैनो नाजानायनि मोनसे गिदिर खैसार सादों होना मखदों।

# पाकिस्तानआव रैखाथि हान्जा नि नावजों लोगोसे गं 3 नावआ दैयाव गोदोंदों, सा 4 सुबुंनि जिउ ख'हा

**इस्लामाबाद, 22 जुलाइ:** पाकिस्तानआव गंथाम नावफोर दैयाव गोदोनाय जाथायाव सा 4 सुबुंनि जिउ गोमायो आरो सा 17 गोमानानै दड। बे जात्रथाया बुधबराव सा-सोनाब खैबर पखुंखां राइज्योनि बीजापुर जिल्लानि रघाघन बान्दोनि दैयाव जादों। खौरां मोन्नाय बादिब्ला गंसे नावयाव गासै सा 18 सुबुंफोर दंमोन आरो जेब्ला बिसोरनो दैमानि गोथो दैयाव थानो नागिरो अब्ला बे जाथाया जायो। जात्रथायनि खौरां मोन्नाय जेब्ला दावबायारिफोरखौ रेस्कु खालामनो गंने नाव दैथायहरनाय जायो, बे गंने नावयावबो जात्रथायाव गोरलैयो। बेनि उनाव गुबुन मोनसे हान्जाखौ रेस्कुनि थाखाय दैथायहरो आरो बिसोरनो सा 4 सुबुंखौ रैखाथि खालामनो हायो। बिसोरनो



सा 4 सुबुंनि गोथै सह'खौबो दैनिफ्राय बोखानो हायो। रेस्कु हान्जाया मिडियानो फोरमायदोंदि, गोमानानै थानाय सुबुंफोरखौ नागिरनाय हाबाफारिया सोलिगासिनो, नाथाय बिसोरनि जिउआ रैखाथियै थानायनि आसा गैया। पुलिसआ बे जात्रथायनि सायाव बुंदोंदि, गिबिसिनि नाव गोदोनाय जात्रथाया नांगौनि बांसिनि सुबुंफोरखौ नावयाव दैखांन लानायनि जाहोनाव जादोंमोन। फारसेथि रेस्कु हान्जानि नाव जात्रथाय जानायनि जाहोना बिसोरनि मोजां रंगौथि गैयैनि जाहोनाव जादों। रैखाथि खालामनो थानाय गिबि नाव गंनैयाव थानाय रैखाथि मावसुमाफोर नावखौ दैयाव सामलायनो रोडैयाव जात्रथायाव गोरलैनां।

# चरण नार्जारी

**अनिल कुमार ब्रह्म (सिगां बिसाननिफ्राय)** ई 1971-72 मायथाइआव सारा आसामावनो मोनसे माहारियारि- राजखान्थियारि दोहौ सोमजि थोडो। असमीयाफ्रा बेखौ 'भाषा आन्दलन' बुंदों। असमत असमीया- हबइ लागिब' बे समानजों असम साहित्य सभा, सदै असम छात्र सन्था आरो बायदि असमीया गौथुमफोरनि सोमावसारनायाव आसम सरकारा आसामनि डु आर डाइनि बेन्दोआव थानाय कलेजफ्राव जुग जुगामि सोलि बोनाय फोरो बिजों इराजीखौ बोखारनानै असमीया बिजोंखौल' थिसनो। असमीयानि अनगायै गुबुन रावारि बिजोंनि फरायसाफ्रा असमीया सोन्दों नांगोबा ग हायै जानै फेयो। बे खान्थिया खैमालिथायै सरकारनि असमीया नडै फरायसालिनो असमीया रावखौ जाबसिन्नाय आरो बर', बांला, हिन्दी बिजोंजों सेकेन्दारि फराय बोनाय फरायसाफोरखौ गोजौ सोलौंथाय लानो हायैनि लामा नाथेनाय खैसार। बे सोलौंथाइ खान्थिया गेसं रावारि जैरै बांला, हिन्दी, बर' बिजोंनि फरायसा, दिथागिरिफोरनि गेजेराव अर सुखाडो। सरकारनि हेंथायैबराक हायेन, ब्रह्मपुत्र हायेन जेरावबो अर जोंब्लावयो। क'कराझार गलेजावबो इराजी बिजोंखौ दोनफिननो थाखाय फरायसा गौथुमा दाबि दिखानानै गणतान्त्रिक रोखोमै बड', बाडालि, हिन्दी, आदिबासी नेपालीफोरखौ खौसे खालामनानै सोमावसारो। दाबिया जाफु डगोमानि आदस गैयै सोमावसारनायाव चरण नार्जारी गेसं रावआरि फोरखौ खौसे खालानानै लिंगुजिटिक माइन'रिटी राइट्स कर्मिटी Linguistic Minority Rights Committee सुंथाबै एल एम आर चि दायो। बे कर्मिटिया दुलाराइ आसाम नाडै शिलचर, करिमगन्ज, पान्डु, क'कराझार, धुबुरीआरो गुबुन गुबुन जायगायाव सुबुं मेल खुंनान सुबुंमत दादोंमोन। चरण नार्जारीनि सुबुरुन, नाजानाय आरो आइनिनि हेफाजाबै सुप्रिम कर्टनिफ्राय खे अडारि लाबोनानै गुरु चरण कलेज (शिलचर), करिमगन्ज कलेज, पान्डु कलेज, क'कराझार कलेज आरो धुबुरी कलेज, गासै आसामनि गंबा कलेजआव इराजी बिजोंखौ लाखिनो हादोंमोन।

ई 1974 मायथाइयाव बर' थुनलाइ आफादनि र'मान हांखो दाबिनि सोमावसारनाय आरो ई 1975 मायथाइनि 25 जुनआव इन्दिरा गान्धी सरकारनि भारत हादत नाडै इमारजेन्सि फोसावनाया चरण नार्जारीनि राजखान्थियारि बिथाखौ गुवार आरो गोखों खालामसिनबावयो। ई 1977 मायथाइनि लक सभा बिसायख'थियाव गोदायै दाजानाय जानाया पाटिजों आखाय हमज्जलायनानै क'कराझार समस्टिनिफ्राय बियो कंग्रेसनि बिजाथि धरनीधर बसुमातारीखौ फेजेनानै देरहासात जायो। बे देरहासात नायखौ चरण नार्जारीआ एक नायकत्वबाद'नि हेंथायै गणतन्त्रनि देरहासातनाय होनानै फोसावदों मोन। ई 1985 मायथाइयाव सान्जा क'कराझार समस्टिनिफ्राय बियो फिन एमएलए सायख' जाबावयो। बे समसिम हालगै पिटिचिनि उदयाचल राइजो दाबिनाया गोखोंमोन। चरण नार्जारीया गावनि गोखों गोहोमनां बिबुंथिजों बिधान सभाखौ सोमावगंलंबाय थादोंमोन। बे हन्थासिम बियो बड'नि मोसा होन्नानै सिनायथि मोन्दोंमोन। नाथाय उनाव ई 1987 मायथाइनि 8 मार्चनिफ्राय उपेन्द्र नाथ ब्रह्मनि दैदेनायाव नख'र हादत एवा हललेन्डनि सोमावसारनाया खुंथायै दोरोद बोनायै गोलैनिफ्राय गोखोंसिनि जाबोनायाव पिटिचिनि बिथाया गुलुं बोयो। ई 1991 मायथानि 27 आगस्ट खालारखालि बे समनि दोलोनि आफादगिरि समर ब्रह्म चौधुरीया गावथार जायो। ई 1991 मायथाइयावनो बिधान सभा बिसायख'थियाव सान्जा क'कराझार समस्टिया चरण नार्जारीया प्रमिला रानी ब्रह्मनि आखाइयाव जेन्तो गोनां जायो। उनाव हालगै ई 1993 मायथाइआव चरण नार्जारीया पिटिचिनि दोलो नागारनानै बिजेपिआ हाबनायाव बे मायथाइयावनो पिटिसिनि दोलोआ सिन साफ गैयै जानानै फेयो। तरुण गगै आसामनि गिबि मन्थि जानाय समाव चरण नार्जारीया बिजेपि दोलोखौ एंगारनानै कंग्रेस दोलोयाव हाबो। बेबादिनो जिउनि बाथायनाय बैसोआव गावनि राजखान्थियारि दिदोमथि गैयै होलोदखौ बियो दिन्थि लादों। ई 2019 मायथाइनि 23 जथाइ खालारखालि चरण नार्जारीया सोगौंयारि जायो। ई 1969 मायथाइआव दतमानि चरत ब्रह्म दत्तनि फिसाजों गेदेर भवानी ब्रह्म दत्तजों हाबा जानाय चरण नार्जारीया रंसारि जानाय समाव बिसिजों लोगोसे साब्रै पिसाजों आरो सासे फिसाज्जा गालाडो। बिसोर जादों- थरिसि नार्जारी, संग्रिला नार्जारी, कहिनुर नार्जारी, मिन्गिला नार्जारी आरो सम्राट नार्जारी।

राजखान्थियाव मुखुब हाबा मावनायैव चरण नार्जारीआ असमीया आरो इराजी रावजोंरादाब बिलाइआव बाइदिथना लिरबिदां लिरनायमोन। कलेजाव फरायनाय समावनो बियो असमीया रावजोंचकुल' (1959) मुनि गांसे खन्थाइ बिजाब लिरनानै दिहुन्दोंमोन। ई 1963 मायथाइआव बर' रावा सोलौंथायनि बिजों महरै आसाम सरकारनि गनायथि मोन्नाय लोगो लोगो थाखोनि फराय बिजाब नांगो जानायाव बियो खोमोन दैनो गोनां जायो, गावनि आंगुथि गोनां बड' माहारिजों खा जानाय जोबोर गोसोयाव गोनां गोबां सल'-बाथा लिरनाडै। बिनि रावआरफ्राबो थांखिनो आरो बोसोन गोनां बिनि जोंनो सोरां नांगौ' रायथाइया बयजोंबो अन्साइ जादोंमोन। 'अनारु थु सिगां' खन्थायनि थाखाय चरण नार्जारीया हारि अनफारि खन्थाइगिरि हिसाबैदिनैसिमबो मुंदांखा जानानै दं। बोराइ बैसोआव ई 2011 मायथाइयाव बियो इराजी रावजों Dream for Udayachal' मुनि गांसे बेसेन बेसेन बहू बिजाब लिरनदों। बियो आलारि' लाइसि (1956) बर' थुनलाइ आफादनि लाइसि 'The Bodo' (5थि, 6थि, 7थि, 8थि बिसान 1964-65 आरो 'जनजाति' लाइसिखौ रुजुदोंमोन।

चरण नार्जारीया हारिसु सिबिसुला सुबुंमोन। फावथिना खालामनानै बियो गोजोन्नयमोनो। कमल कुमार ब्रह्म लिरनाय, बिथ'राइ आरो जेवारि आफाद दिन्थिफुंनय 'राजा इरागदाव' फावथाइयाव बिसो सासे इराज केप्टेनिनि फाव लादोंमो। जनक झांकर नार्जारीनि खिन्थि गासै फावथाइफ्रावबो बियो फावथिना दिन्थिदोंमोन। चरण नार्जारीया सासे गहाम मेथाइ लिरिगिबोमोन। बियो गावनि मेथाइफोरखौ मावनो दंखो होनानै खनोमोन। बिनि मुदांखा मेथाइफ्रा जादों- 'मोनाबलि समाव' आरो 'गलाप बिबार' बड' माहारिजों खेब अनसाय जादोंमोन आरो दाबो अराय गोजोर जानानै दं।

# आबादारिफोरा जन्तर-मन्तरआव धर्ना होदों, उननि स्फटआ उत्तर प्रदेश जागोन

गोदान दिल्ली, 22 जुलाई : मिरु सरकारनि मोनथाम आबाद आयेनफोरनि हेंथायै धर्ना होबाय थानाय आबादारिफोरा दिनै बृहस्पतिबाराव दिल्लीनि जन्तर-मन्तरआव गावसिनि धर्ना होनायख जागायो। अदेबानि आबादारिफोरा फोसावबावदोंदि, बिसोरनि उननि सिफटआ उत्तर प्रदेश, जेराव धर्ना होग्राफोरा बिजेपिखौ गोखोडे नारसिननो बिर्थांख बानायदों। धर्ना होग्राफोरा फिन खेबसेबाव आबाद आयेनफोरखौ बोखाना लानो दाबि दोखानायजों लोगोसे उत्तर प्रदेशआव गोखों धर्ना होनो थियारि खालामदों। मख 'जाथावदि, फैगौ बोसोराव उत्तर प्रदेशआव बिधान सभा बिसायख'थि जागोन। सिन्धु



बडरिआ थानाय आबादारि देदेनगरि प्रेम सिं आंगुआ बुंदों, उननि सिफटआ उत्तर प्रदेश

जागोन, जाय बिजेपनि गाहाय जायगा। जों बिजेपिखौ गोखोडे नारसिनगोन आरो गावसा

होगोन। खौरां एजेन्सिजों सावरायनायव आंगुआ बुडेदि, जों सावरायनो थाखाय थियारि, नाथाय आबाद आयेनफोरखौ बोखाना लानायनि अनगा आरो

जेबो गुबुन राहा गैया। मख 'जाथावदि, आबादारिफोरा दासिमाव सरकारजों खेब 11 सावरायबाय नाथाय जेबो राहा ओंखाराखै एबा थांखि लानो हानाय जायाखै। बबेखानि गोबाब समनिफ्रायनो बे सावरायनाय थावथाना दड। रोजा रोजा आबादारिफोरा दिल्लीनि सिन्धु, टिकरी आरो गाजिपुर बडरिफोराव थानाय बोसोरनि नभेम्बर दाननिफ्रायनो मोनथाम आबाद आयेनफोरनि हेंथायै धर्ना होनायै थांखिफोरखौ बोखाना लानायनि दाबि खालामदों। आबादारिफोरा दिनै दिल्लीनि जन्तर-मन्तरआव धर्ना होदों। बे धर्नायाव सानफोमबो सा 200 आबादारिफोरा बाहागो लानानै संसदन दैज्जां बोथोरनि जथुतमाया जोबजासिम बाहागो लागोन।

# हादोरनि सोल्लोथाइ मन्थि प्रधानआ नभ'दया स्कुलनि इन्ट्रेन्स आन्जादखौ खुनो फोसावबाय

गोदान दिल्ली, 22 जुलाई : जेइ मेन्स आरो नीटनि उनाव सोल्लोथाइ मावख'आ नभदया स्कुलनि 6 थि थाखोआव मुं थिसन्तो थाखाय सोल्लोथाइ सेसन 2021-22 नि इन्ट्रेन्सनि अक्टखौबो फोसावनानै होबाय। बे आन्जादखौ 11 आगस्टआव हादरनाडे 11 रोजानिबो बांसिन मिरुफोराव खुनाय जागोन। जर'खा बाथाया बेनोदि, नभ'दया स्कुलफोराव मुं थिसन्नायखौ इन्ट्रेन्सनि गेजेरजों लानाय जायो। बे स्कुलआ हस्टेल थानानै फरायहोनाय जायो। करना जेनानि जाहोनाव दासिमआव बे आन्जाद खुं'नांगोखौ दोन्थ'नो गोनां जाबोबाय थादों। नाथाय करना इन्फेक्सननि थासारिखौ



सरासन्सा जानाय नुनानै सोल्लोथाइ मावख'आ बेनि अक्टखौ फोसावबाय। मिरुनि सोल्लोथाइ मन्थि धर्मेन्द्र प्रधानआ टुइट खालामनानै इन्ट्रेन्सनि अक्टखौ फोसावदों। लोगोसेनो आन्जादनि समाव

करना प्रकलखौ आबुडे नोजोर लाखिनोबो बिथोन होदों। नभदया स्कुलफोराव इन्ट्रेन्सनि गेजेरजों गासै 47,320 गथ'फोरखौ 6 थि थाखोआव थिसन्तो थाखाय सायख'नाय जायो।

# जम्मु काश्मीर जेलाव जेलारनि बिबानखौ पुलिस बिबानगिरिआ सामलायदों



जम्मु, 22 जुलाई : जम्मु काश्मीरनि जेलफोराव जेलार गैया। पुलिस बिबानगिरिआसो जेलनि बिबानखौ सामलायदों। सानैबो बिबानगिरिनि ट्रेनि लानाय आरो हाबा मवानाया आलादा आलादा। श्रीनगरनि सेन्ट्रल जेलजों लोगोसे राइज्जोनि दर 7 जिल्लाफोराव पुलिस बिबानगिरिफोरा बिबान सामलायदों। खोला काश्मीरनि पुलबामा आरो अनन्तनाग, जम्मु सभागनि बिस्तबाड,

रियासि, हीरानगर जेलफोराबो पुलिस बिबानगिरि इन्सपेक्टर थाखोनि बिबानगिरिआ जेलारनि महाराव हाबा मावदों। फैनो गोनां बोसोराव जम्मुनि कट गलबाल जेलनि जेलार दिनेश शर्मा आरो डिआइजि सुल्तान महम्मद लनजों लोगोसे खावसेनिफ्राय बांसिन जेलारफोरा आञ्जिरा मोनगोन। बेनि उनाव गासिबो जेलनि बिबानया पुलिस बिबानगिरिनि आखायअवा थागोन। बेबादिआ थानाय 7 बोसोराव

जेलनि जेलारखौ थिसनयैनि जाहोनाव जादों। जम्मु काश्मीरआव गासै 14 था जेलफोर दं। जेराव गनैआ सेन्ट्रल जेल, गं 10 थाया जिल्ला जेलफोर आरो गं 2 आ दालाइसा जेलफोर। नख 'रारि बिबाननि सुलुनि बादिब्ला जम्मु काश्मीरनि जिल्लाफोराव बि एस एफ आरो सि आर पि एफनि माखासे गागि बिबानगिरिफोरखौ थिसन्तो हागौ। जम्मु काश्मीर जेलआ थानाय 1 बोसोरनिफ्रायनो इड पि एस सिनिफ्राय जेलारखौ मोन्तो हायाखै। श्रीनगर सेन्ट्रल जेलनिफ्राय पाकिस्ताननि उतखारि नबिद जट आ खारखोमानायनि उननिफ्राय बेवहाय पुलिस इन्सपेक्टर बिबानगिरिआनो जेलारनि बिबानखौ सामलायदों।

गोदान दिल्ली, 22 जुलाई : हाउसि एन्ड आरबान डेभेलपमेन्ट क-अपारेसननि सेक्रेटारि दुर्गा शंकर मित्रा बुंदों, पिएम केयासि फान्डनि गेजेरजों 1,222 प्रेसार सुई अब्जापसन (पिएएस) अक्सिजेन दिहुनाय प्लान्टखौ गनायथि होदों आरो बियो 15 आगस्टनि सिगां जागाय जेन्तो हागौ। आधिखालाव 300 पिएएस प्लान्टआ हाबा मावगासिनो दं। सिआइआइनि गेजेरजों खुनाय रि ये लइस्टेट कनफ्रेन्सखौ सोमोन्दी लानानै दुर्गा शंकरआ बुंदों करना इन्फेक्सननि जाहोनाव प्रपाटि सेक्टरआ गोबां गोहोम गोलैदों। नैथि दोहोखौ सामलायनो हाबाय आरो

# 1,222 अक्सिजेन प्लान्टखौ 15 आगस्टनि सिगां जागायजेन्तो हागौ



थामथि दोहोनि सोमोन्दी सन्देह खालामनायखौ फोरमायदों। सरकारआ थानाय बोसोराव करनानि गिबि दोहोखौ होबथानो थाखाय माखासे थांखि लादोंमोन, जेराव मार्च 2020 आव फोसावनाय माहारियारि लकडाउनआवो दंफा देरोमोन। बे समाव हादतनाव बे इन्फेक्सनजों भुगिनो थाखाय थोजासे बिबानि भेन्टिलेटर्स पिपिइ किट आरो मुलि गैयामोन। नाथाय थेवब्लाबो गिबि दोहोनि समाव इन्फेक्सन जानायखौ सामलायनो हानायआ मख 'जाथाव। भारतआ नख'रारि दाबि दैखानायखौ फुरा खालामनायजों लोगोसे गुबुन हादतनोबो फाहामथायखौ जागायनो होदों।

# दर 3 हादतफोरनि थाखाय भारतआव 24 आरब डलारखौ रैखाथि होनो हादों

गोदान दिल्ली, 22 जुलाई : अस्ट्रेलियानि थाखाय गुबुन हादतफोरा बोसोराव 22.8 आरब आमेरिकी डलारखौ दोन्थुमनो हादों। जार्मान सेन्टार फर इन्टिग्रेटिड बायडाइभासिंटीआ मोनसे सार्भेआव मोनथिनो मोन्दीदि, मुलुगनाडेनि मेनग्रब, रानस्राव मार्शलैन्ड आरो मिडजनि जाहोनाव लैथोमा बोरिमाया बानायनाय ब्लु कार्बन हक्सिस्टेमआ बोथोर सोलायनायनि गोहोम गोग्लैनायखौ खम खालामनायव मदत खालामदों। बिगियानगिरिफोरा इकसिस्टेमआ कार्बन सोबख'नायि जाहोनाव मुलुगआ मुलाम्फा मोन्नायखौ नायबिजिदों। बिगियानगिरिफोरा बुंदों, बोथोर सोलायनायनि



बेसेनखौ गोदान रोखोमै बुजिनो नाजादों आरो बेखौ दरफ्रामबो हादतखौ बिथा खालामनायनि साव नायबिजिरनाय जादों। इकसिस्टेमआ मुलुगआव जेसेबां रंखाथिनि अन्सुंथाय होदों, बेनि बेसेना 160 आरब डलारनिफ्राय 220 आरब डलारनि गेजेराव

जानो हागौ। रंखाथिखौ रैखाथि होनाय गासै 190.67 आरब डलार आमेरिकी डलार एबा 106 आरब डलार जानो हागौ। भारतनि बिगियानगिरिफोरा बुंदों दर 3 हादतफोर अस्ट्रेलिया, इन्डोनेसिया आमेरिकानि रंखाथि अन्सुंथाय होनायआ बयनिखुइबो

बांसिन बेवहाय अस्ट्रेलियानि रंखाथि बिहोमा होनायआ बयनिखुइबो बांसिन 22.8 आरब डलार जानो हागौ। अस्ट्रेलियानि बोरिमा हाग्रा बारिआ जेसेबां कार्बनखौ सोबखाडो, बेजों माखासे हादतफोरा 1 बोसोराव 22.8 आरब डलारखौ रंखाथि होनो हायो। भारतआ मुलुगआव बयनिखुइबो बांसिन कार्बन ओंखारनाय हादतफोरनि गेजेराव दंफा देरो। जुदि अस्ट्रेलिया, इन्डोनेसिया आरो किडबानि बोरिमा हाग्रा बारिया गैयामोनब्ला थासारिया गाज्रिसिन जागौमोन। बेदर 3 हादतफोरनि हाग्रा बारिनि जाहोनावो भारतना बोसोराव 24 आरब डलारनि मुलाम्फा जादों।

गोदान दिल्ली, 22 जुलाई : थानाय 6 सप्ताहनि गेजेराव जम्मु-काश्मीरनि सिडाव उतखारिफोरनि थांलाय-फैलायाव गोखैयै बारायनायखौ नुनो मोन्नाय जादों। लोगोसे रैखाथि हान्जाफोरनि सायाव पाकिस्ताननि उतखारिफोरनि गार्लोबनायखौबो बारायनाय नुनो मोन्नाय जादों। मख'नो गोनांदि, बे बोसोरनि दासिमआव जम्मु-काश्मीरआव गासै सा 86 उतखारिफोरखौ गावथारबाय आरो बिसोरनि गेजेराव सा 36 खौ थानाय जुन-जुलाई दानआव जानाय खेब 16 एन्काउन्टरफोराव गावथारनो हादों। बेनि गेजेरजों जुलाई दानआव उतखारिफोरनि बयनिखुइ बांसिन थांलाय-फैलायफोरखौ नुनो मोन्नाय जादों। इन्डियान एक्सप्रेसनि खौरनि बादिब्ला, जुलाई दाननि 20 सानफोरनि गेजेरावनो खेब 10 एन्काउन्टर खालामनाय जायो, बेयाव गासै सा 20 उतखारिफोरखौ गावथारनाय जायो। बे सा 20 नि गेजेराव साब्रँ उतखारिफोरा पाकिस्ताननिमोन। सुलुनि



बादिब्ला, बे बोसोराव रैखाथि हान्जाफोरा गासै खेब 36 अपारेसन खालामो आरो बेयाव सा 86 उतखारिफोरखौ गावथारो। बिसोरनि गेजेराव सा 80 खौ काश्मीरआव आरो सा 6 खौ जम्मुआव गावथारो। थैनाय खावसे उतखारिफोरनो लस्कर-ए-तैयबाजों लोब्बा दडमोन। सान्थिफोरनि बे अभियानआव रैखाथि हान्जाफोरनि सा 15 जवानफोरबो मुख्लं जायो। बेराफासै सा 19 सरासन्सा नोगोगारिफोराबो गावसोरनि जिउखौ बाउनाडो। बे बोसोरनि 25 फेब्रुवारीआव भारत आरो पाकिस्ताननि डिजिएमअखौ

लोगो हमनायनि उनाव दरनै हादरफोरा जुथाय बिबुंथि फोसावनानै दावहा दोन्थ'नायखौ मान होनो फोसावदोंमोन। अब्लाबो पाकिस्ताननि फासैनिफ्राय सिस्फायारखौ सिफायनाया सोलिगासिनो दड। सुलुनि बादिब्ला, थानाय सप्ताहआवबो पाकिस्ताननिफ्राय खेबब्रँ हाबफैखोमानो नाजानाय जादों। बिसोरनि गेजेराव खेबसेखौ फेलें खालामनो हायो आरो खेवथामआ जाफुंसारोबो। दासिमआव काश्मीरआव गासै सा 20 उतखारिफोर हाबफैनायनि खौरं मोन्नाय जादों। बे बोसोरनि जुलाईसिमआव उतखारिफोरनि

फसंथानफोराव सा 69 उतखारिफोर हाबदों। अदेबानि थानाय बोसोरावबो बे समावनो सा 85 सुबुंफोरा उतखारि फसंथानफोराव हाबदोंमोन। उतखारि फसंथानफोराव हाबग्रा बांसिन दावहारफोरनो काश्मीरनि कुलगाम, शपियं आरो पुलवामा जिल्लानि। थानाय 2020 आव गासै सा 174 उतखारि जादोंमोन आरो 2019 आव बेनि अन्जिमाया सा 143 मोन। संगालि रिपटनि बादिब्ला, आधिखालाव हायेनआव सा 200 निखुइ बांसिन उतखारिफोर दड आरो बिसोरनि गेजेराव 40 जौखोन्दीआ पाकिस्ताननिफ्राय काश्मीरआव हाबफैयो।

No. TECH- 40/SE(R&B)/e-tender/2020-21/83 Dated Kokrajhar the 20/07/2021  
**Tender No. 159 of 2020-21**  
**RE-PRESS NOTICE INVITING TENDER**  
 The Superintending Engineer, PWD (R&B) Circle, Kokrajhar on behalf of Governor of Assam invites bids from approved and eligible Contractors registered with Public Works Department (Roads), Assam/Contractors registered with Bodoland Territorial Council in the category of Class-I (A, B & C) & Class-II for "Improvement of Guwabari Bazar to Thakur Rani Mandir Road (Providing by ICBP from Ch. 0.00m to Ch. 900.00m) and construction of 100 cm dia NP-3, 7.50m single opening HPC 1 No.etc." for bid amounting to Rs.71,69,491.00 (approx) (Rupees seventy one lakh sixty nine thousand four hundred ninety one) only. Details may be seen at website <http://assamtenders.gov.in> and also in the office of the undersigned during office hours.  
 Sd/-  
 Superintending Engineer,  
 PWD (R&B) Circle, Kokrajhar  
 IPR(BTC)-149/2021

## आंनि हेंथायारिफोर

ओइ हेंथायारिफोर  
मा बुंखो मा सानखो,  
नोंसोर आंखो बेबायदि बुंखो  
बेनि जेबो सिमा गैया  
माखो नुनानै नोंसोर आंनि सायाव  
एसेबां गिदिर दाय फोनांखो  
जानादों आं दिने हेंथायारिफोरनि  
नारसिननायाव गावखौनो बारजों बिरबायनाय  
जिगाब गोरान बायदिसो मोनबाय आं,  
गात्रि नडब्लाबो गात्रि सानानै लाबाय बिसोर आंखो  
नंखाय बाध्राखौ नंगौ सानानै आंनि एसेबां गिदिर  
दाय फोनांबाय नोंसोर,  
बिनिखायनो आं बुंनो सानो दानि मुगायाव बर'जों  
बर'नो सैथो होननानै दासान।  
बे मुगायाव थानानै थानोब्ला धोन-दौलत, रां-रुपा  
गोनां मानसियासो थानानै थानो हायो।  
धोन-दौलत गोनां सुबुनियाव गिदिर दायब्लाबो  
नंखाय जायो नाथाय जोंबायदि निखावरि  
फोरनियाव फिसा दाय मोनोब्ला बेखौ जोबोट गिदिर  
दाय जागोन।  
बिनिखायनो आं सानो दानि मुगायाव निखावरी  
मानसिफोरा थानानै जेबो मुलाम्फा गैया।

मिच मन्दिरा नार्जिरि  
काजलगाव

## नेनानै थागोन आं

नों स'नाया खालामो मानो  
आंनिफ्राय एरा-एरा,  
गोसोआदि आंनि  
नोंखौनो आमथा-सिमथा  
सिमां रनसायो अरायथा।  
नोंनि हायलो-देमलो महरा  
नोंनि हायनारि आखला  
नोंनि गोदें रावआनो  
खालामबाय आंखौ सोफे-सोफे,  
रेगा थालांबाय  
मावनायाव-दांनयाव  
जानायाव-लोंनायाव  
फरायनायाव-उन्दुनायाव  
जिउ सोलेराव आंनि रोमे-रोमे।  
एरखांबाय नोंखौ लानानैनो  
गोबों मन्दिराव बेसेबा सुखु-दुखुनि  
नोंखो मोन्नाय मोनैनि जारिमिन।  
नाथाय नों मानो बुजियाखे जसिना  
आंनि गोसो-गोबोंनि बाध्राखौ ?  
नों स'नाया आंखौ नायफिनदो  
निखावरि सानानै, बायगर सानानै दा नेवसिदो,  
आंखौ नों हास्थायब्लाबो  
आंनि गोबोंनि बाध्राखौ बुजियाब्लाबो  
थेवबो नेनानै थागोन आं  
गोथार गोसोजों बे संसाराव  
नोंखौ मोन्नायनि आसायाव ॥

समिर बरगयारि  
गामि-गोदानारि ( जुइलागा )  
ला:सो:-गरुभासा  
जिल्ला:-चिरां ( बि.टि.सि. )

## सोरांनि लामा

सिखां बर' सिखां  
बर' माहारि फोर-  
बर' हारिनि थाखाय  
नाजानांगोन जों।  
बर' माहारिखौ जों  
खौसेयाव लाबो नांगोन  
जों बर'नि थाखाय  
बर' सुबुआ नाजा नांगोन।  
बर' हारिनि थाखाय  
जोंहाबो थे दड  
जों रावनिबो गेजेन जानानै थाया  
जों बर' माहारि।

मुस्रि थाउनसिं बसुमतारि  
बालपारा  
ला:सो: सिलिखागुरि  
जिल्ला: बडागाव जिल्ला ,

## दिंग्रिनि फाखन

दिंग्रिनि फाखनाव गोजावनानै  
दिने मा मोनखो बड' फिसाफोर ?  
गावखौ फोथाना लाखिनो ना गावखौ  
फोजोबना लानो, फे बुहुमनि सुबुफोर  
दिनेनि मुगाया लोंनाय जानायनि  
सम नलिया।

दिंग्रिनि फाखनाव गोजावनानै  
गावखौनो गाव सानस' हाला गावखौनो  
गाव सिनायनो हालिया।

दिंग्रिनि सिराफआ बेसे गोजोन  
सुदेम मिलौदो बे अमब्रिद  
बिदेखौ नोंसोरदि माल्लाबा  
एंगार हाबावगोन ? सि. सि,  
लेंहरो हनै आंगो लोगो जिउ  
मोनसेनि लोगो दाबखा लाउदुमा।

नाथाय दिंग्रिनि फाखनाव  
दिनेनि सुबुड रोजा-रोजा गामियारि  
ओनसोलाव निसानि फ'खियाव ग'ब'नानै  
गोजोन नख'रा सिलिंखार जालांबाय।  
नखरनि गोजोन देराया गुबुलांबाय  
अन्नाय गोदें राव गैलिया

सोदोमस्रि गैयै जालांबाय।  
आन्दो आन्दो राइजो जानाय  
बुजि रोडे जालांबाय दुखुथिया  
सुबुड निसानि बिदेखौ सिबै सिबै।  
गोमालांजोब्याय हारिनि थि  
महर मुस्रिया माल्लादि सिगार  
बावगोन हारिनि गोग्गोम देराया।

जाखांदो सिखांदो बड' हारि  
गोजोन खुलि दानो सिरिसे।  
नागारनो नाजादो निसानि  
बेसादखौ लोंनो।

दिंग्रिनि गोथौ फुंखिखौ फ'ब'नानै  
लाफिनदो गोमालांनोसै नै हारिनि  
सेथि महरा दिंग्रिनि बोहेनायजों।

मुस्रि अबिनाश बसुमतारि  
सामथाइबारि

## अनजालि

ओइ अनजालि  
ओइ अनजालि  
दखना थावसि गाननानै  
साद्रि बालें लें सारखोनानै,  
खारस्लिउ खारस्लिउ थाबायनानै  
बबेसिम आगान सुरदों नों  
ओइ अनजालि।  
रथ' आंबो थांफानो अनजालि  
आं थांफानायखौ  
रागा दाजों नों अनजालि,  
नाथाय लामा ससेनिफ्राय  
गारि मोनाब्लाबो आं नोंखौ,  
आंनि गारिआव दैखाना  
लांगोन अनजालि सना।

मुस्रि रामटेंया ब्रह्म  
काजलगाव  
ला:सो: सट' निलिब्वारि  
जिल्ला- चिरां, बि टि सि आसाम।

## दै बादि

बोहेयो अरायबो दैआ,  
थादनाय गैयाबालानो खोलाहा,  
खालामदो, जों बयबो साननाय वेबादि  
मेट्रिक आनजाद सौसि लां, दै बादि  
दै बादि बोहै होदो, जोंनि मावनाय दांनया  
फराय लेखाखो, दै बादि  
दै बादि बोहै होदो, जोंनि गियानखौ।  
दै बादि अनलायदो खौसैयै,  
नाथाय, हमथादो अगेन आखलखौ,  
नाजानायखौ आद्रा दाखालाम,  
दै बादि सौसि लां, उदां जा।

मुस्रि दिपेन बसुमतारि  
रुणीखाता  
चिरां, बि टि सि

## रंजालि गथ' फोरनि सौरा


### हायनारि मैनाथि

फुंबिलिनि जारं सानबादि  
सोनाब फैसालियाव-  
जेबोला नों मुहनि सारफ्राव हरदोंमोन  
जारौ-मारौ महरै फैलाव मिथिंगाआव;  
दावमा-दावसा, जिउ-जिरात रंजाखांदों  
रैसुमै मिलौदो खबामजों।  
सहायख'हायै दुखारु देखो  
मोजिद गासेनिलागै बावगारना-  
आंबो मेगन फिदेंदोंमोन  
गुस्थियाव मिनिस्लुनाय लाना।  
सानख'नो हायै दावदाब  
दाब्दिसेनि लागै नाध्रोदना-  
नोंनि हायनारि महरखौ,  
नायहरना मोनो आ गोजोन्नाय।  
बेसेदि समायखांदों मिथिंगा बिखा;  
जोंब्लावखांनयाव नोंनिनो-  
हायनाश्री महर लाना।  
नाथाय जेबोलादि, नों  
गोदोलांदों लोगोआव-  
सगलोबसार खोमसिजों;  
अबोला आं जायो खाराव माराव।  
हायनारि मिथिंगानि आजिरायाव;  
गोजोम फिनांदोंमोन आं  
दाहानि लैथोमायाव  
अराय जुगामि।

मैखोम दैमारि  
गामि- खासफुर ( हालांबाजार )  
कक्राझर ( बि टि सि )

## बालें सिख्ला

ओइ समायना सिख्ला नोंनि महराव  
जानाडे आंनि गोसोया उरां फारां;  
मासेबां समायना मासेबां रमायना  
ओइ अनजालि सिख्ला नोंनि महरा।  
बुंथिनो सानब्लाबो बुंनो हाया नोंनि  
बे बायदि महरखौ नायगोमोनानै  
आदै मद'-द', बिखा फादां-दां  
फामे बिबारनि देन्था बायदि नोंनि आखाय।  
मोखाडव नायब्ला आयलाब महर  
जानजि नोंनि मोनज्जाय जानजि बायदि सेरथे  
गुस्थि नोंनि बेलाव बायदि सिन्न सिन्न  
गोसोआ नोंनि मोनै मोन्थाम  
मेगन नोंनि साम' लादायनि बिखं बायदि  
मुसुगुर नोंनि दावब' खुगा बायदि।  
सामफ्रामबो जाखांफेयो आंनि मेगन थाइनेयाव  
नों अनजालि बालें सिख्लानि महरा।  
नोंजों आंजोनि समाय लानायआ थागोन  
आय अनजालि नोंखौ मोनाब्ला आं थाना थानो हायो  
जों सानैनि गेजेराव जागोन जुलिनि रादायआ  
बैसाग दान गेजेरावनो नेनानै दं।



मुस्रि पबिथ्र बसुमतारि  
हालां बाजार

## आंनि अनजालु

आंनि अनजालुआ आंखौ  
माबहोला लांफे बावगोन।  
नोंखौ नेनायावनो आजोलि बैसोया  
आंनि ओरैनो बारग' लानोसै।  
उनावबा मादि सानगोन नो ?  
बारफुनाय बिबारा गेवलाडै  
अरायदिन थाबाय थाया।  
नोंनि अनगा रावनिबो  
जानो आं हानाय नड।  
नोंनि अनगा रावखौबो  
लानो आं हानाय नड।  
ओइ, अनजालु नों बहा दं ?  
ओइ, अनजालु नों मा खालामना दं ?  
नोंखौ लामा नायै नायैनो  
आंनि बे लाइमोन सोलेरा  
ओरैनो बायगिल लांबाय।  
आय नो अनजालु आंखौ  
माबोलादि लांफे बावगोन।

मिच अलका ब्रह्म  
गामि- गमाबिल, दतमा

## बिबार



बिबार-बिबार मानो बारो नों बिबार  
फेयो नों मानो सानसे सानैनिनल'  
जिउ लानानै फैलाव मिथिंगा  
बिखायाव ?  
दडनामा नोंहा सानसे सानैनिनल' जिउ  
नंगौ नों इसोरजों थिनहर जानाय  
बे फैलाव मिथिंगा बिखायाव ?  
सम आरो बोथोरजों गोरोबनानै  
फेयो आरो थाडे नों बे फैलाव मिथिंगा  
बिखानिफ्राय.....।  
समायना-रमायना बायदि हायना  
महरनि बिबारफोरा  
गेवलां गेवथां बारो  
हायना महरनि नों मोदोमफु बिबार  
बिदै सोबनो बिरबाय बिरबाय  
नागिर बायो नोंखौ बिबार  
आय बिबार नों मानो मोजोमसेबो  
नोंनि हायना महरखौ नुफा-माफा  
बे फैलाव मिथिंगा बिखायाव

मिच मैना बरगयारि  
रामफलबिल।

## उसुमा रजे

उसुमा रजे नोंखौदि  
आं बेसेबां मोजां मोनो  
नाथाय नों मिथिया जानो हागौ।  
बै समाव आं नोंखौ मोजां मोनबोनाया  
अरायबो थारोमोन।  
नाथाय दिनेसिम गोबाव सम जाबाय  
नोंजों नुलायैआ  
सानबाय थायो नोंदि मात्रे दं।  
दाबो गोसोखाडे नोंनि  
हायना गोनां महर मुस्रिखौ लानानै।  
दाबो आं नायगौ सानो  
खाथियाव नोंखौ अरायबो।  
मात्रेदि दं नोंनि सोलिनया  
मात्रेदि दं नोंनि गोसोनि साननाया।  
ना नों आंखौसो बावगारबाय नामा ?  
ना नों आंखौसो नेवसिबाय नामा ?  
आंखो बावगारनानै  
आंखो नेवसिनानै  
गुबुनि फानजारियाव  
हाबनो दासान नों रजे।  
अरायबो सानो  
अरायबो गोसो खाडे  
नोंखौ आं आंनि अरायनि  
जिउनि उसुमा रजे सानना।

मुस्रि फ्रिन्स बसुमतारि  
गामि- सानजा मावरियागाव  
जिल्ला-कक्राझर, बि टि सि, आसाम

## ए पि एस सि खेलेंखारिनि गाहाय दायनिगिरि राकेश पालआ जामिन मोनबाय

सि आइ डिआ थिसन्नाय 27/2018 नम्बर केसनिफ़्राय राकेश पालआ दिनें जामिन मोन्नो हायो। मख 'नाय जायोदि, ए पि एस सि खेलेंखारिनि सायाव राकेश पालनि हेंथायै दिसपुर पुलिस थाना, डिब्रुगड़ पुलिस थाना, बाङघर पुलिस थाना आरो सि आइ डि नि मोनसे केसखौं लाफानानै गासै मोनब्रै केस थिसन्नाय जादोंमोन। डिब्रुगड़ पुलिस थानानि केसयाव पालआ गोजौंसिन बिजिरसालिनिफ़्राय सिगाङावन्नो जामिन मोन्नो हाखांबाय। सोलिफु समाव राकेश पालआ सि आइ डि आरो बाङघर पुलिस थानायाव थिसन्नाय केसनि सोमोन्दोयाव जोबथेसालियाव दंबोगासिनोमोन। दिनें राकेश पालनि बिजिरगिरि पिरुज खानआ जामिन मोन्नायनि बागै खौरां बिजॉनि गेजेरजों फोरमायथि होदों। बिथाङा बुंदोंदि, सि आइ डि केसनिफ़्राय राकेश पालआ जामिन मोन्नो हाबाय। आसामनि गंसे जरखा बिजिरसालिया दिनें बिथानि केसखौं जामिनयाव हगारबाय। बिजिरगिरिया फोरमायनाय बायदिब्ला बे केसनि सायाव उननि बिसार खोनासंहोनाया फैगौ 5 आगस्तआव जागोन। जुदि बाङघर पुलिस थाननि केसयाव जामिन मोनोब्लानो राकेश पालआ जोबथेसालिनिफ़्राय उदां जानो हासिगोन।□

## एम बाथाजों लोगोसे एन एल एफ बिनि सा 23 दैदेनगिरि आरो सोद्रोमाफोरा गोजोन बोहैथियाव फैफिनानै आखाइ दैखांबाय

लोगोसे सा 20 सोद्रोमाफोरा दिनें आसाम-अरुणाचल सिमानि सिकारिदाङजों नांजाबफानाय हाजोनिफ़्राय ऑंखारबोनायनि उनाव आसाम पुलिसआ बिसोरखो लालपानि पुलिस थानासिम लाना फैयो। लालपानि पुलिस थानायाव आसाम सरकारनि मन्थि पियुष हाजरिका, बि टि सिनि गाहाय मावफुं सोद्रोमा प्रमद बर', लेङइ गाहाय गबिन्द बसुमतारी आरो गिबि मन्थिनि राजखािन्थयारि बोसोनगिरि जयन्त मल्ल बुजर बरुवा मोननि नुजाथिनायाव मोनसे हाबाफारि खुंफुंलाङे। बे हाबाफारियाव गावसोरखौन्नो गथायनाय एन एल एफ बिनि आर्मि चिफ एम बाथा, आफादगिरि आइ बि बुंथि गोरा, लेङइ आर्मि चिफ बक' बसुमतारीजों लोगोसे गासै सा 23 सोद्रोमाफोरखौ मन्थि पियुस हाजरिका, बि टि सिनि गाहाय मावफुं सोद्रोमा प्रमद बर' मोनहा हाथियार नागारनानै गुबै बोहैथियाव गिदिंबोफिन्नायनि थाखाय बिहु फालि आरो आर'नाइजों बरायो। गावसोरखौन्नो गथायनाय हाबाफारिनि उनाव मन्थि पियुष हाजरिकाया मोनसे खौरांगिरि मेल खुंनाने बुङेदि आसाम सरकारनि गिबि मन्थि ३० हिमन्त बिश्व शर्मानि खावलायहरनायनि फार्से मान होनानै दिनें गोदानै जोनोम मोन्नाय हाथियार दैग्रा हान्जा एन एल एफ बिआ हिंसाखौं नागरनानै गुबै दाहाराव गिदिंबोफिनदों। आसाम सरकारनिफ़्राय बिथांमोननिसिम बरायनाय बाउहरदों होन्नानै बिथाङा बुङे। खौरांगिरि मेलाव बाहागो लानानै बि टि सिनि गाहाय मावफुं सोद्रोमा प्रमद बर'आ बुङेदि एन डि एफ बिनि मोनब्रैबो हान्जऱया हाथियार नागारनानै गुबै दाहाराव गिदिंबोफिन्नायनि उनाव ओन्सोलाव गोजोन थासारि फैदोंमोन। नाथाय एम बाथानि दैदेन्नायाव बि टि आर ओन्सोलाव फिन मोनसे हाथियार दैग्रा हान्जऱया जोनोम मोन्नायाव जों माखासे बिथिङाव जिंगासिनो गोनं जादोंमोन। मानोना हिंसाया जौगाथायाव अरायबो हेंथा होयो। गोजोन गैयाब्ला मोनसे हारि एबा गंसे हादोरा माब्लाबाबो दावगानो हाया। गिबि मन्थि हिमन्त बिश्व शर्मानि राहा लानायनि थाखाय जों गोजोन्नाय मोन्दों। बिथानि आवथायाव थानाय नखर बिफाननि हाबाफारि लानायाव आरो पुलिसनि जरखा डि जि पि जि पि सिंहनि दैदेन्नायाव दिनें बि टि आर ओन्सोला फिन अलखदिनफ़्राय रैखा मोननो हाबाय होन्नानै प्रमद बर'आ बुङे। हाबाफारिनि उनाव एन एल एफ बिनि आर्मि चिफ एम बाथाजों लोगोसे गासैबो सोद्रोमाफोरखौं पुलिसनि मोनसे हान्जऱया गारिजों गुलाहाटीसिम लाबोयो। दिनेंनि बे हाबाफारियाव बि टि सिनि मावफुं सोद्रोमा निलुत् स्वरगीयारि, ३2 नं पासने सेरफां बियाबनि बारग' एम चि एस ए आरो बि जे पिनि दैदेनगिरि जितु किशान, ३1 नं पासने सेरफां बियाबनि सोद्रोमा दिपक मौर, आसाम पुलिसनि आइ जि पार्थ सारथि महन्त, उदालगुरि जिल्लानि एस पि हिरन्य बर्मन, माजब्रात पुलिस थानानि बिबानगिरि मिन्तु सन्दिक्के मोनहाबो बाहागो लादोंमोन।□

## केबिनेट जथुमनि गेजेरजों माखासे गोनांथार बिथांखिफोरखौं लादों राइज्यो सरकारा

थानाय आबादारिफोर, दान हिसाबै हगारनाय हाफोराव आबाद मावनानै जाग्रा आबादारिफोराबो पि एम-किसान बिथांखिनि मुलाम्फाखौं मोन्नो हागोन। फिसा साहा बागान बिगोमाफोर आरो बिफां-लाइफां गाइग्रा आबादारिफोराबो बे बिथांखिनि मुलाम्फाखौं मोन्नो हागोन। पन्चायत खुंथाय फसंथानजों लोब्बा थानाय सोलोंथायारि दाफामथायाव जिल्ला परिषदनि आफादगिरिखौं मासिगिरि महरै थिसन्नानै जिल्ला थाखोनि नायसंगिरि आफाद दानाय जागोन। दख'रा पन्चयतनि आफादगिरिखौं मासिगिरि महरै थिसन्नानै खोन्दे थाखोनि नायसंगिरि आफाद दानाय जागोन। दिनेंनि बे केबिनेटनि गेजेरजों जिल्ला बेंगिरिफोरनो आबाद एबा मैगं-थाइंगंफोर मावनानै जानो थाखाय उफ्रा हा जागायनानै होनो थांखि लानाय जायो। लोगोसे थाखानाय आबहावा आरो हाग्रा बिफाननि नेमखान्थिफोरखौं बाला आरो अन्थाय बोखांनायनि बेलायाव गुबुन रोखोमनि खालामनो थांखि लानाय जायो। खुंथायारि दाफामथायनि बेलायाव राइज्यो केबिनेटआ रांखान्थियारि आफाद एबा फाइनासियेल कमिटि दाफुंननो गनायथि होनाय जायो। मोनसे बिफानआरि रांखान्थि आफादआ 2 कौटि रां सिम बिथांखिनि सेंसन् एबा गनायथि होनो थाखाय कमिटि दागोन। बे कमिटिआ मोनफ्रोमबो सप्ताहनि समबारखालि मेल जथुमगोन। चिफ सेक्रेटारिनि दैदेन्नाय स्टेन्डिं फाइनान्स कमिटिआ 2-10 कौटि रांनि बिथांखिखौं गनायथि होनो हागोन। बे कमिटिआबो मोनफ्रोम सप्ताहनि मंगलबारखालि खेबसेयै मेल जथुमगोन। गोदानै दाजानो गोनां इन्डिजेनियास एन्ड ट्राइबेल फ़ैइट एन्ड काल्सार बिफाननि आवथायाव मोन ३ बिथोनगिरिखौंबो गनायथि होगोन। बेफोर बिथोनगिरिख'फोरा जाबाय आर्सिअ'लजि, डिरेक्टरेट अफ मिउजियाम, डिरेक्टर अफ हिस्ट्रिकेल एन्ड एन्टिक्वारियान स्टाडिस। दिनेंनि बे केबिनेट मेलनि गेजेरजों बारग' एम पि आरो मिरुनि मन्थि राजेन गहाइखौं फुङ एन्ड सिभिल साफ्लाइ, कन्जुमार एपियार्स बिफाननि केबिनेट मन्थि मर्जादा होन्नानै मासिगिरि महरै थिसन्नायनि थांखिखौं लायो। लोगोसे गुवाहाटी मुलुग सोलोंसालिनि प्रफेसार ३० ननिगपाल महन्तखौं राइज्यो मन्थिनि मर्जादाजों सोलोंथाय बिफाननि बोसोनगिरि महरै सायख'नाय जायो। जल जिबन मिसन बिथांखिनि आवथायाव जिल्ला बेंगिरिफोरा जिल्लानि गार्जेन मन्थिनि गनायथि लानानै 10 कौटि रांसिम फान्ड बाहायनायखौं नोजोर लाखिनायनि गनायथि होनायखौं दिनेंनि केबिनेट जथुमनि गेजेरजों थिरांथा लानाय जायो।□

### चन्दन ब्रह्मनि खोथा होनाया मोकथां महर मोनासै

आजारनि फाहामथायनिफ़्रायबो जानगाराव थाबोनादों। सानफा एफा फाहामथायारि जेंनाया बांबोनायाव ओन्सोलनि राइजो-राजाफोरनि दाबि खालामनाय बायदिदैयो बि चि सिनि सिर्गानि लेङइ गाहाय मावफुं सोद्रोमा चन्दन ब्रह्मआ 2006 माइथायाव सुबनखाता राज्योयारि देहा फाहामसालिखौं गं 30 बिसिना गोनां देहा फाहामसालियाव फोजौखानाय जागोन होन्ना खोथा होनानै अन्थाइ खाम्फा गायसन्दोंमोन। नाथाय अन्थाइ खाम्फा गायसन्नायनि 17 बोसोर बारलानायनि उनावबो देहा फाहामसालिया फोजौ जायाखिसै। जाउनाव दिनेंसिमबो गहाम फाहामथायनिफ़्राय जानगाराव थानादों सुबनखाता ओन्सोलनि राइजो-राजाफोरा। बे बिथिङाव आधिखालनि बि टि सि सरकारा मा बिफाव लायो बेयो नोजोर होश्रवाना जागोन।

## पुलिसआ तामुलपुरआव सासे नंखाय एम बि बि एस देहा फाहामगिरिखौं खादों

नारायण मेडिकेल स्टर एन्ड आस्था क्लिनिकेल लेब रैटरि मुंनि गंसे फार्मासिनिफ़्राय मनजित दास मुंनि सासे सुबुंखौं हमनानै तामुलपुर पुलिस थानानो गथायना होयो। पुलिस सुलुङा फोरमायनाय बादिब्ला मन्जित दासआ ओन्सोलाव गोलाव बोसोरनिफ़्रायनो गावखौन्नो सासे एम बि बि एस देहा फाहामगिरि महरै सिनायथि होनानै फाहामथाय होबोदोंमोन। मिथिनाय बादिब्ला मनजित दासआ सासे फिजिअ थेरापिस्टनि दिप्ट'मा मोन्नाय सुबुंमोन। पुलिसआ मनजित दासनि हेंथायै मोनसे केस थिसन्नानै तामुलपुर थानानि केस नं 294/11/21/ आइ पि सि 336/419/467/468/471/ आरो भारतारी देहा फाहामथाय काउन्चलनि 1956 माइथायनि आयेननि बायदिदैयै केस थिसन्नानै बेनि सायाव नायबिजिरगासिनो दं।

## तामुलपुरनि खौरां लाइनि एजेन्ट बासुदेब दासखौं गोबां आफाद, गौथुमफोरा बरायदों

आफादनि मावफुं आफादगिरि ध्रुबच्यति शर्मानि दैदेन्नायाव नलबारि जिल्ला खौरांगिरि आफाद आरो नलबारि जिल्ला थुनलाइ आफादनि मोनसे थान्दै हान्जऱया मान बाउहेंयो। थान्दै हान्जऱया बासुदेब दासनि तामुलपुरनि अमयापुरियाव थानाय न'आव दावबायहैनानै बान्था, बिहु फालिजों मान बाउनानै बरायो आरो बिथानि गहाम देहा आरो गोलाउ जिउनि थाखाय आर'ज गाबो। मख'नो गोर्नादि बराय हाबाफारियाव दुलाराय आसाम खौरांगिरि आफादनि मावफुं आफादगिरि ध्रुबच्यति शर्मा, नेहाथारि किशर कुमार कलिता, नलबारि जिल्ला खौरांगिरि आपादनि गाहाय नेहाथारि रमेन कलिता, नलबारि जिल्ला प्रेस क्लाबनि आफादगिरि कमलेस शर्मा, दुलाराय आसाम फरायसा आफादनि सोलोंथाइ नेहाथारि, भबजित बेजबरुवा, दुलाराय बाक्सा जिल्ला फरायसा आफादनि गायसनगिबि आफादगिरि एबा बारग' फरायसा दैदेनगिरि सनेस्वर कलिता, तामुलपुर प्रेस क्लाबनि लेङइ आफादगिरि सक्शेवर डेका, गागि खौरांगिरि प्रसाद दास, दिपक कुमार पाथक आरो नयन च्यति दासजों लोगोसे माखासे गागि सुबुंफोराबो बाहागो लादोंमोन। थान्दै हान्जऱया बासुदेब दासखौं बरायनानै तामुलपुरनि थुनलाइ आरो खौरां मुलुगाव गोलाव समनिफ़्रायनो गुबुन गुबुन रोखोमनि जेंना-जेंसि नेवसिबोनानै बासुदेब दासआ सिबिथाय होबोनायखौं बाख्नायो आरो फैगौ समफोराव तामुलपुरनि मेलेमारि बिथिंखौं जौगाखां होगोन होन्नानै मिर्जिंथिनाय फोरमायो।

### बाक्सा जिल्ला बरमाखौं रोजा रोजा दावब'फोरा समायहोदों

फिसाफोरनो आदार दौनायनि नुथायखौं नायलाङे। सोमोन्दोखौं बौरै दायो बेखौं सुबुंफोरनो दिन्थिनानै होयो। सुबुंफोरा माब्लाबा माब्लाबा दावब'फोरखौं बुथारनो फैयोब्लाबो ओन्सोलनि सुबुंफोरनि सांग्रांथिनि थाखाय बेबायदि इनाय खामानिखौं मावनो हायो। जाय समाव दावब' बुथारनानै जोबथेसालियाव जोबजानादों बेबायदि समावनो बरमायाव दावब'नि सैरैखाथियाव राइजो-राजाफोरनि सांग्रांथिनि थाखाय रावबो फ्लानफोरा दावब'फोरखौं बुथारनो हायाखै। बैफोर दावब'फोरा 6 दान थानानै गुबुन सिनाय मोनै जायगायाव बिरलाङे आरो 6 दाननि उनाव फिन गिदिंबोफिनो। बेबायदिनो गोलाव समनिफ़्रायनो दावब'फोरा ओन्सोलनि राइजो-राजाफोरनि गोसोयाव गोजोन्नाय होबोदों।

## सुंद' सल' जुलि खालार

मुश्री गुथाल बर'

सोमयनाया भालुकुमारि गामिनि अनाराम माहाजोननि फिसाज्ला। सोमखोरा बिमा-बिफानि नायल'-जाल' सासेल' फिसाज्ला। अनाराम मामाय दै जोबनो गैया।बियो भालुकुमारि गामिनिनो देरसिन माहाजोनमोन।बियो गामिनि गोरिख गुन्द्राफोरखौं इसे खामानि माव होनानै रांफोरखौं बुरुजा बुरुजा होनायमोन।बिमा-रुफाथिया गावनि सासेल' फिसाज्लाखाय मा नांगौ मा नाङ होफेनऱयमोन।सोमखोराबो बिमा-बिफानि सायाव मा नांगौ मा नाङ मोनजोबोमोन।सोमखोरा दा द'समा एइस एस स्कुलआवनो थाखो जि (10) आव फरायो।सोमखोरा फरायनायाव रंगौ जेखौं माष्टार सोङे बेखौं थोंजों फिन्नाय होयोमोन।बिनिखायनो माष्टारफ्रा सोमखोरखौं जोबोर मोजौ मोनोमोन।सोमखोर ऐबार एइस एस एल सि फनेल होनांगौ।फहनाल होखानानै गाव जा बायदि होनो होन्दों बेखौं होनो हानानै बियो गोसोआव रंजाखाङे।रिजालाबो मास मोनथामनि उनावनो हांगोन।अब्ला एइस एस एल सि नि रिजाला होबायमोन।सोमखोरा रिजालखौं नायनानै नुबायदि बियो फास्ट डिभिसन फास जानानै मोनथाम आयदायाव लेथार मोनानै 80ब आव फास जाबाय।सोमखोरा गावजों फरायबोनाय समायनाखौं मोजां मोनो जिउयै माहामै असे आंगोनिसनानै।

समायनाया गुफुर गावदों गोजौ गिदिर नामजों महर मुझिजों एखे।समायना मोननि नआबो भालुकुमारि गामिआवनो।सोमखोरमोननिजों समायना मोननि नआ गोदान-गोजाम जालायो।भालुकुमारि गामिआ गिदिरखाय सा-भालुकुमारि खोला भालुकुमारि गामिआव रान्दों बे सा भालुकुमारि आवनो समायना मोनिनि नआ।सोमखोर मोनिनि नआ समायनायाबो बिमा-बिफानि सासेल' फिसाजोखाय समायनानि अनसोगारो।समायनानि बिफया गामिआवनो एम इ स्कुलआव गाहाय फोरोंगिरिनि साखि मावयो।समायनाखौं बिमा-बिफाया लेखा-फरा फोरोंनानै मानसि गिदिर खालामनायनि मिजिं दं।समायनाया दा भालुकुमारि गामिआव फरायो।बियो ऐबार थाखो जि (10) आ फरायखानानै मेट्रिक आनजाद होगोन।समायनाया एइस एस एल सि आनजाद होखानानै आनजादआ मोजां जादौना जायाखै बेखौं थाम दानावसो मिथिसिगोन सनानानै ननि हावा हुब्बाआव नांथानायासै।समायनायाबो मोजां मोनो सोमखोरखौं।गावसोर उन्दैआवनो समय लालाय खादों।गावसोर सोरजोका हावा जायोब्ला गावसोरनि समायखिरा मथे खामानि मावगोन होन्नानै।समायनानि एइस एस एल सि नि आनजादनि रिजाला होबाय होन्नानै।समायनाया मोनसे आयदायाव लेथार मोन्दौब्लाबो नैथि थाखोयावसो फास जाबाय।समायनाया गाव सैथि थाखोखौं लुबेदौब्लाबो मोनैनि गावनि सायाव रागा जौनानै दुखु खालामदोंमोन।बेखौं मिथिनायै दुखु खालामनो नाङ होन्नानै बिमा-बिफाफ्रा बुरखायनायसै।

दिनें सोमखोरा कक्राइर साइन्स कलेजआव सैथि बोसोराव मु थिसन होदोंमोन।समायनायाबो बे कलेजआवनो मु थिसनदोंमोन।बे समावनो सोमखोरा समायनाखौं लोगो मोनो आरो सोङे समायना नों मानो बेवहाय फैयामोन।समायनाया बुंबाय- आदा आं बे कलेजआव एडमिसन खालामफेदोंमोन।आदाया मानो बेवहाय फैयामोन।आंबो बे कलेजआवनो एडमिसन खालामफेदोंमोन।सोमखोरा बुंबाय समायना आंहा माबा बुंनांगौ दं

## गिबि मन्थि शर्माआ पि डाब्लिउ डि( लामा ) खामानि मावनाय आयदानि सायाव गासै इन्जिनियारफोरजों नायसं मेल जथुमदों

सोलिगासिनो थानाय लामा लुफुंथाय बिथांखिफोरनि सालाय सुलु लानानै गिबि मिन्थि शर्माआ बुङेदि,राइज्योनि गासै जिल्लाफोरावनो सुबुंफोरनि हान्था-मैला खालामनाय आरो लामा फोनांजाबनायनि राहखौं फोजौखांहोनायनि थाखाय सरकारा थांखि लानाय बायदिदैयै लामा लुफुंथायनि जौगानायखौं आबुं महर होनांगोन।मोनफ्रोमनि पि डाब्लिउ डि डिभिजननि सिङाव सोलिगासिनो थानाय लामा लुफुंथाय बिथांखिफोरखौं थिखानाय समनि गेजेराव मावफुंनांगोन।लामा लुफुंथायनि खामानिखौं गिबिथि होन्नानै मावफुंनो थाखाय गिबि मन्थि शर्माआ इन्जिनियारफोरखौं खावलायबावनानै राइज्योनि गेजेराव पि एम जि एस वाइ लामा लुफुंथाय मावफुंनायनि सायावबो खौरां लानानै गिबि मन्थि शर्माआ राइज्योनि मोनफ्रोम ख'ना-ख'नला गामिफोराव हाबनानै गोनं जानाय गामिफोराव लामा लुफुंनायनि थाखाय थांखिलाइ थियारि खालामनो इन्जिनियारफोरखौं बिथोन होबावदों।बे मेलयाव सेन्ट्रल रड एन्ड इनफ्रास्ट्राक्सार फान्ड (सि आर आइ एफ), एस अ पि डि, रेरेल इनफ्रास्ट्राक्सार फान्ड (आर आइ डि एफ)नि आवथायाव खामानि मावनायनि सायाव गिबि मन्थिऱया खौरां लायो।बेजों लोगोसे गिबि मन्थि शर्माआ दिसपुर, मालिगाव, सरबबातिआव लुफुंगासिनो थाखाय प्लाइअभारनि खामानि जौगानायनि सायावबो खौरां लायो।□

### गोदानै बिबान मोन्नाय गसाइगाव महकुमा बेंगिरि राहुल कुमार गुप्ताखौं बरायदों

गेजेरजों बरायो।बे हाबाफारियावनो आगुनि महकुमा बेंगिरि पल्लबि सरकारखौं बिदाय होनाय जायो।बे हाबाफारियाव आगुनि गसाइगाव महकुमा बेंगिरि पल्लबि सरकारा गोदानै बिबान रुजुनफेनाय राहुल कुमार गुप्ताखौं बयनिबो गेजेराव सिनायथि होनानै गावनि खुंथायनि समाव महकुमानि साफ्रोम राइजो-राजाफोर आरो खौरांगिरिफोर गावनि खामानि मावनाय समाव हेफाजाव होबोनायनि थाखाय बयनिसिमबो साबायख'र जासिनायजों लोगोसे गावखौं हेफाजाव खालामनाय बायदिनो गोदानै महकुमा बेंगिरिखौंबो ओन्सोलनि गोमगो समाज दानाय, जोगाखां हाबा मावनाय आरो राइजो-राजाफोरनि सिबिथाय होनायनि बेलायाव नांगौ रोखोमनि हेफाजाव होनो बयखौंबो खावलायो।हाबाफारिनि जोबथा बुब्लियाव आगुनि महकुमा बेंगिरि पल्लबि सरकारखौं गसाइगाव महकुमानि सिङाव थानाय मोन 4 प्रेस क्लाबनि सोद्रोमाफोर आरो गसाइगाव महकुमा खुंगिरि मावख'सालिनि साफ्रोम मावफारियाफोर बिदाय होयो आरो गोदान महकुमा बेंगिरि राहुल कुमार गुप्ताखौं दुंडूदै बरायो।लोगोसे बे बिदाय आरो बराय फोर्बोंनि गेजेरजों बिथां राहुल कुमार गुप्ताया फैगौ समाव गसाइगाव ओन्सोलनि राइजो-राजाफोरनि गाहामनि थाखाय खामानि मावगोन होन्नानै खोथा होयो।दिनेंनि बे हाबाफारियाव बाहागो लादों फारियै गसाइगाव महकुमानि लोगो खुंगिरि गौतम प्रियम महन्त, गसाइगाव महकुमानि मेजिस्ट्रेट, सान्ता कार्कि सेट्टि, प्रियंकर देका, गसाइगाव महकुमानि एस डि पि आर अ बिग्राइ बसुमतारिजों लोगोसे गसाइगाव महकुमानि सिङाव थानाय मोन 4 प्रेस क्लाबनि सोद्रोमाफोर आरो खौरांगिरिफोरा बाहागो लादोंमोन।□

### गौरां दैसानि हा खुरखानायाव जिंगा सिनो गोनां जादों कक्राइर बरुवापारा ओन्सोलनि

मावनानै जाग्रा हिसाबै जुदि बे हा खुरखानायखौं होबथानायनि राहा लायाब्ला फैगौ माखासे बोसोरनि गेजेरवनो गासै आबाद फोथारफोरजों लोगोसे न'बांफोरा जोबस्त्रांलांगोन।बेनिखायनो गामिनि आरो ओन्सोलनि राइजो-राजाफोर गावसिनि रैखाथिनि थाखाय हा खुरखानायखौं होबथानायनि राहा लानो सरकारखौं खावलायदों।बरुवापारा ओन्सोलनि गोबां गामिफोर जैरै कुतामारि, सा-बरुवापारा, खोला-बरुवापारा, बर्दजियारुगि बायदि गामिनि थागिबि सुबुंफोरा बोसोरफा एफा गावसिनि आबाद मावग्रा हाखौं गौरां दैसानि हा खुरखानायनि जाहोनाव खोमानानै लाबोनो गोनां जादों।गामियारिफोर अजद होनाय बायदिब्ला गोबां खेब खावलायबोसेयावबो सिर्गानि समफोराव सरकार बे हा खुरखानायखौं होबथानायनि जेबो राहा लायाखै।बेनिखायनो सोलिफु आसाम सरकार आरो बि टि आर सरकारखौं बे ओन्सोलनि थागिबि सुबुंफोरनि रैखाथिनि थाखाय गौरां दैसानि हा खुरखानायखौं होबथानायनि राहा लानांगौ होन्नानै खौरां बिजॉनि गेजेरजों खावलायहरदों।□

### अरायथा साखि थिसनांगौनि दाबिजों दुलाराइ आसाम साफाइ कर्मि आफादआ रांखान्थि

आफादनि कक्राइर जिल्ला आफादनि आफादगिरि अजय कुमार दास आरो नेहाथारि उत्तम बासफरनि दैदेन्नायाव मोनसे हान्जऱया दिनें गावसिनि बे दाबिखौं मावफुंनांगौनि थाखाय कक्राइर जिल्ला बेंगिरिनि जोहै आसामनि रांखान्थि मन्थि अजन्ता नेयगनिसिम गांसे गोसोखां बिलाइ दैथायहरदों।बे गोसोखां बिलाइनि गेजेरजों साफाइ कर्मि आफादआ देहा बिफानजों लोगोसे जायखि-जाया बिफानआव ब्रैथि खोन्दे साखियाव थिसननांगौनि दाबि खालामनाय जादों।□

नांजों।बुंदों आदा मा बाभ्रा बुंनांगौ दं आंजों।बाव बुंजाया समायना होन्नानै बुंदोंमोन आरो गावनि बाइकखौं स्टार खालामनानै गाखोयो समायना होन्नानै बुंदोंमोन अब्ला समायनाया गाखोखानाय लोगो लोगो गौरां फाकंआव थानायसै।अब्ला समायनाया बुंबाय- बुंदों आदा।समायना नों आंनि मोजां मोन्नायखौं बावगारलॉबाय नाम।बावगाराखै आदा आं नोंखौं माब्रै बावनो हानो आदा नोंथ' आंनि आंगोनि मोदायसो आं नोंनि मोदायसो।आदा जों उन्दैआव समायखिरा लानाया दाबो गोसोआव दं आदा आइ लाभ इउ आदा आं नोंखौं मोजां मोनो आदा होन्नानै समायनाया गाबनो हमो।दागाब सना आं नोंनिखा जेब्लाबो आं नोंखौं मोनाब्ला बे बुहुमाव थानाय नङा सना बे बुहुमवखौं अराय समनि थाखाय नागारलांगोन सना।आदा मानो बिदि बुङे नों जों सार्नेनि मोजां मोनलायनाया नंखाय नङा।जों सार्नेजों जुलि जाथारगोन आदा जुलि जायाब्ला जों सार्नेबो समायखिरा मथे जों सौसिगोन आदा होन्नानै आरोबाव गाबनो हमो।बिदि समावनो दावमिफ्रा गोसो होसार होसार गाबनानै बिरलानायसै अब्ला मोनानो बारा गोबाव सम गैलामोन।बिसरोरा गावबा गाव नआव थालायानऱयसै अब्ला बिसोरनि बाध्राखौं सोरबा सासेआ खोनाबाय बे बाध्राखौं जाय खोनानाङा बेयो सोर?बेयो समायनि बाध्रा।समायना बिफाया कक्राइराव थानाय समाव बिसोरखौं नुनानै नायकुमादोंमोन बेयावनो सोमखोर आरो समायना मोननि मोजां मोनलायनायखौं मिथिदोंमोन।बेखौं मिथिनायै उसु-खुथु समायना बिफानि गोसोआ गाबखाङे।जाय फिसाजोखौं लेखा-फरा फोरोंनानै गिदिर-गोलाव जानो फोरोंदोंमोन बे फिसाजोआनो बिफानि सायाव बिदि अगेन हाबा मावदों।समायना बिफाया गोसो गिलिदजों नआव थानायसै।नआव थानानै समायनाखौं नेनायसै।र'सालिआ बेखौं दिनें नआव फैयोब्ला होनाय लोगो लोगोनो समायनाया नआव फेनायसै।अब्ला बिफाया गुरे गारांजों सॉफलाबाय समायना आय कलेज एडमिसनआ मोनबाय।औं आपा।मानोथो गोबाव जाबोआ।आफा आं लोगोफोरनाव हाबबोनाय समाव गोबाव जाबोदों आपा।नंखाय नों आंखौं थगानयो दासान समायना।नों सोमखोरखौं सिनायो नामा औं आपफ नोंहा सोमखोरजों मा सोमोन्दो दं।आं सोमखोरखौं मोजां मोनो आफा बेबो आंखौं मोजां मोनो ‘‘ हि इस लाभ मि’’।मा नों सोमखोरखौं मोजां मोनो।उन्दैनिफ़्रायनो देरजासिम मा नांगौ मा नाङ होबोनानै दिनें नो'गोसो थोदों।नों दिनेंनिफ़्राय सोमखोरखौं लोगो हमनो मोनला होन्नानै बुयो, सोबायो राययो आरो न' सिङाव जोबनानै दोनो।

फार्सेथिं सोमखोर बिफायाबो समायनाखौं गोसो थोदों होन्नानै रायो, बुयो, आरो सोबायो बेखौंबो न सिङाव जोबनानै दोनो।सान हर जेबो जाया दै लोङ गारा दिन्थ थांहोबाय थायो सोमखोरा।समायनायाबो जेबो जाया गारा बिसिनियाव उन्दुसोनानै गाबो।अब्लासो समायना बिमा बिफा आरो सोमखोरनि बिमा बिफाया मा खालामनो होन्नानै खाफाल सौयै-सौयै गाबो।फिसाजोनि बिदि हालोदखो नुनानै समायना बिमा-बिफाया सोमखोरजों जुलि होनो आरो फिसाजोनि मोजानि थाखाय जुलि होनो थिरांथा लायो।फारसेथिं सोमखोरनि बिदि हालोदखौं नुनानै सोमखोर बिमा-बिफायाबो जिर्गामिनो हमो।बिसोरनो फिसाज्कानि मोजानि थाखाय समायना जों जुलि होनो थिरांथा लायो।सोमखोर आरो सोमखोरनि बिमा बिफाया समायना मोननि नआव थानानै सोमखोर आरो समायनि थाखाय जुलिनि खालार दान्नो समायना मोननि नआव थानायसै।बिसोरखौं फेनाय नुनानै समायना बिमा-बिफाया आलासि सिबिनो मोनानै गोजोनदोंमोन आरो हाबनि खालार दान्नानै थि समाव समायना आरो सोमखोरनि हाबाया जाना थानायसै।

## आइरा खानआ बिफा आमिरनि अनगायै बिमारिनाजों गावनि गोसोनि बाध्राफोरखौ सावरायो

गोदान दिल्ली, 22 जुलाड़: बलिउड फावखुंगुर आमिर खाननि फिसाजो आइरा खानआ मुंदांखा स्टर किडसनि गेजेराव सासे। बियो सम सम खौरांफोराव थाबाय थायो। आइरा खानआ ससेल मिडियाआव गोबां एक्टिभ थायो। ससेल मिडियाआव बिनि फेन फलईआ सोरबा स्टरनिफ्राय खम नडा। आइराया बेनि गेजेरजों गावनि जिउजों सोमोन्दो गोनां जर'खा बाध्राफोरखौबो फोरमायवाय थायो। आधिखालाव आरोबाव खनसे बियो जर'खा बाध्रा फोरमायदों। आइरा खानआ फोरमायदोंदि, गाव-गावनि गावनि बिमार्जों लोगोसे मोन्दांथिफोरखौ पिंकी प्रमिस गोसोनि मोनफ्रोम बाध्राफोरखौ गावनि गोसोनि टु मीनि गेजेरजों शोयार



मोन्दों। सावगारिखौ नायनाने बुनो हायोदि, आइरा खान आरो रिना दत्तआ बबेयावबा दावबायनायनि रंजानायखौ लादों। बे सावगारिजों लोगोसे आइरा खानआ गावनि बिमार्नि थाखाय जर'खा पस्टबो लिरदों। बे पस्टआव बियो लिरदों आं आंनि बिमार्जोंबो बाध्रा सावरायोदि, आं माबायदि मोन्दांछे 7 सरसन्सा महरै माखासे बाध्राफोरखौ टाइप खालामनांगौ जायो आरो बे बाध्राफोरखौ फोरमायनायाव गाबनो ओं खारो। आइरा खानआ बेनि अनगायै गावनि मोनसे सेल्फीखौबो शोयार खालामदों आरो कन्फर्ट जननिफ्राय बाइजोआव ओं खारनायनि सोमोन्दे सावरायदों। बियो लिरदों-गावनि कन्फर्ट जननिफ्राय बाइजोआव ओं खारनो अरायसम मोजां मोना आरो माब्लाबा माब्लाबा बेबादि जेबो मोन्दांथिया। ससेल मिडियाआव आइरा खाननि बे पस्टआ गोखैयै भाइरेल जादों। बिनि फेन्स आरो गोबां ससेल मिडिया इउजारफोरा पस्टखौ मोजां मोन्दों। लोगोसेनो कमेन्ट खालामनानै गाव गावनि फिनजाथायखौबो होदों।

## सुपार डेन्सार 4 आव करिश्मा कापुरआ शिल्पा शेड्डीखौ रिप्लेस खालामनाय नडा



गोदान दिल्ली, 22 जुलाड़: बलिउड फावखुंगुर शिल्पा शेड्डीनि मुंदांखा फालांगिरि फिसाइ राज कुन्दाया आधिखालाव सोंथि सौनायफोरनि उनाव बेंखन्नाने थादों। राजखौ बावैसो समाव मुम्बाइ क्राइम ब्रान्सआ अश्लील सावथुन बानायनायनि आरो माखासे एपसआव दिन्थिनारनि केसआव हमदों। राजखौ हमनायनि उनाव शिल्पाखौबो ससेल मिडियाआव गोबां टूल खालामनाय जादों। आधिखालाव माखासे सुबुंफोरा बिनो साहस होदोंब्ला बेराफासँ माखासेया सोंथि सोंदोंदि, राजआ बे खामानिखौ मावो होन्नाने शिल्पाया मिथियोमोन ना ? राजनि ग्रेपार खालामजानायनि उनाव बे खौराडबो फेदोंदि, शिल्पाया सुपार डेन्सार सेप्टर 4 नि शूटिआव फेनो थाखाय गनायाखै। जायनि उनाव

बलिउड फावखुंगुर करिश्मा कापुरआ बिखौ रिप्लेस खालामगोन। नाथाय आधिखालाव बे खौरांखौ लानानै गोदान आपडेटआ सोरडव फेदों। सुलुनि बादिब्ला, करिश्माया शिल्पाखौ रिप्लेस खालामनाय नडा। बियो मोनसे एपिसडनि थाखायल' गेस्ट जानानै फेगोन। करिश्मानि खाथिनि सोमोन्दो गोनां वेबसाइटा फोरमायदों, फावखुंगुरआ स्वखौ खालामनाय नडा। बिखौ मोनसे एपिसडआवल' गेस्ट महरै नुनो मोनगोन। मख'नो गोनांदि, सनी टिभिआ गावनि मावख'यारि इनस्टाग्राम एकाउन्टआव फेनो गोनां एपिसडनि मोनसे फिसा प्रम'खौबो शोयार खालामदों। जेराव करिश्मा कापुर, जाज गीता पुर आरो अनुराग बासुजों लोगोसे शिल्पांनि मासियाव जिरायनाय नुनो मोन्दों।

मुम्बाइ, 22 जुलाड़: प्रियमणिनि मस्ताफा राजजों जुलि जानाया गनायथि गैया। मस्ताफा राजनि गिबि बिसि आयशाया बिखौ आइन बेरेखा बुंदों। आयशाया फोरमायनाय बादिब्ला, मुस्ताफाया गावखौ अफिसिएल तालाक खालामाखै। मुस्ताफा आरो आयशाया 2013 आव जुदा-जुदा जादोंमोन। बिसोरहा सानै गथ'फोरखो दड। प्रियमणिआ 2017 आव मुस्ताफाजों जुलि जादों। दा फेमिली मेननि फावखुंगुर प्रियमणिनि जुलिखौ



लानानै मुस्ताफानि गिबि बिसिआ सेलेन्स खालामदों।

मुस्ताफा राजनि बिसि आयशाया दाबि दैखांदोंदि, गाव दासिमबो

बिनिनो बिसि जानाने दड। बेराफासँ मुस्ताफाया गिबि

बिसिनि बेबादि बाध्राखौ रं लाफिनो नाजानाय होन्नाने फोरमायदों। रिपटनि बादिब्ला, मुस्ताफाया फोरमायदोंदि, गावनि सायाव दाय जाबसिन्नाया गासैबो नंखाय। आं गथ'पोरनि थानाय-जानायनि रांखौ समबादिदैनो आयशानिसिम हरो। बियो आरोबाव रं बख'बावनो नाजाबावदों। मुस्ताफाया सोंथि दैखांदोंदि, बियो गासै दाय, जेराव नख'रि गोथौ दाड-बाजिनिबो लोब्बा दड, बेफोरखौ एसेबां गोलार सम मानो नेनांगोमोन ?

## ये रिस्ता क्या केहेलाता हैनि मुंदांखा फावखुंगुर प्रियंका उधवानीआ अन्शुल पान्डेनि सायाव दाय जाबसिन्दों

गोदान दिल्ली, 22 जुलाड़: टिभि सिरियाल ये रिस्ता क्या केहेलाता हैनि मुंदांखा फावखुंगुर प्रियंका उधवानीआ अन्शुल पान्डेआ श्व'नि सेटआवनो मोजां मोनलायदोंमोन। बिसोर सानैआ गोलार समनिफ्रायनो सानैजों डेटि खालामदोंमोन। नाथाय प्रियंकाया बे सोमोन्दोखौ लानानै जाय बिबुंथि बावैसो समाव होदों, बेखौ सुबुंफोरा गोमोदों। बेल' नडा गावनि बिबुंथियाव फावखुंगुरआ गावनि बयफ्रेन्डनाव गोमोथाव दाय जाबसिन्दों। प्रियंकाया अन्शुल पान्डेनि सायाव थगायनायनि दाय जाबसिन्नाने बुंदोंदि, गाव थानाय सप्ताहआव भेक्सिन थुजादों आरो गोबां लोमजादोंमोन। अन्शुलआ मोनाबिलिनि 7.00 सिगायाव न'निफ्राय ओंखारलादों आरो बियो गावखौ माखासे घन्टयाव फेफिनगोन होन्नाने बुंलांदोंमोन। नाथाय बियो नैथि साननि मोनाबिलिआवबो फेफिन्दों।



फावखुंगुरआ बुंवावदों, थानाय इनस्टाग्रामआव स्टरिफोरनिफ्राय माखासे सानफोरनिफ्रायनो अन्शुलआ गावखौ थगायदों। गाव अन्शुलनि थगायनाय बाध्राफोरखौ बिनि

गोदान दिल्ली, 22 जुलाड़ : डाइरेक्टर प्रिडितसार करण जहरआ ससियेल मिडियाआव गोबां एक्टिभ थायो। बियो माब्लाबा गावनि फिसाफोरनि माब्लाबा पारिनि सावगारिफोरखौ सेयार खालामबाय थायो। करणनि गोसोनि बाध्राफोरखौ बिनि इन्स्टाग्राम स्टरिजोंनो मोनथिनो हायो। बे स्टरिफोराव करणआ गावनि मोजां सेन्स अफ हिउमारनि सिनायथिखौ होयो। बिनि हिउमारजों बुंफबनाय पस्टफोर सुबुंफोरखौ मिनि होनो एराक जगापलाबो होयो। करणआ ससियेल मिडियाआव गावनि बावैसो समनि गोसोनि बाध्राखौ फोरमायदों। करणआ गावनि गोदान इन्स्टाग्रामआव लिरदोंदि, जानो हागो गाव इन्स्टाग्रामजों लोगोसेनो डेट खालामनानै थालासिगोन। रावबो गुबुन पारिनारआ गावखौ लाइक, ब्लक, आनफल आरो आरोबाव फल' खालामनो गनायथि होनाय



नडा। माख'नो गोनांदि, मोनसे इन्टरभिउआव करणआ मख'दोंमोनदि गाव टविन्कन खानानि क्लस जादोंमोन। 2015 आव टविन्कल खानानि गिबि बिजाबनि लन्सनि समाव करणआ फोरमायदोंमोनदि, गाव टविन्कलखौ मोजां मोनोमोन। बेयो बिनि स्कुल समनि बाध्रा, जेब्ला करण जहरआ 15 बोसोरनिमोन।

आधिखालाव करण जहरनि थाखाय ससियेल मिडियानिफ्राय लानाने एवाड श्व' सिमाव गोबां रोखोमनि जक्स बानायनाय जायो। करणआ फोसावदों मोनसे रमान्ठिक सावथुन बानायसिगोन। बावैसो समाव बियो मोनसे सावगारिखौ सेयार खालामनानै फोरमायदोंमोन गाव गावनि रिलिज जानो गोनां सावथुन फोसावदोंमोन।

## दा फेमिली मेननि फावखुंगुर प्रियमणिनि जुलिखौ गनायथाव नडा होन्नाने फोरमायदों गिबि बिसि आयशाया

## गाहाम देहानि राहा

### चेरि फिथाइया देहानि थाखाय मुलाम्फा गोनां

गोजा गाबनि चेरिआ नुनायाव जेसेबां समायना जायो एसेबांनो जानायावबो गोदै गोथाव जायो। चेरिआ रोखोमसे एरैबादि फिथाइ, जायखौ रमान्ठिक फिथाइफोरनि गेजेराव सानाय जायो। अदेबानि चेरिआव देरहोग्रा-लावहोग्रा गुणफोरनि फुंखा दड, जेराव थाइमिन, राइबफ्लेबिन, भिटांमिन बि, भिटांमिन ए, भिटांमिन सि, भिटांमिन के, भिटांमिन इ, भिटांमिन बि 6, पेटथेनिक एसिड, नियासिम, फलेट, पेटसियाम, मंगानीज, कपार, आयरन, केलिशियम आरो फसफरस थायो, जाय देहानि थाखाय जोबोद गोनां। बेयाव एन्टिइन्फ्लेमेटेरिनि गुण मोनाय जायो, जाय ब्लाड सुगार लेबेलखौ कन्ट्रोल खालामनायाव जोबोद मदद खालामो। चेरिआ माखासे बेरामफोरनि फाहामथाइबो होयो।



खालामनायाव मदद होयो।

(2) खि गोर खिनानि साबसिन फाहामथाय: चेरिआव फाइबार्खौ गोबांडे मोन्नाय जायो, जाय दोगोन खालामनायाव गोबांडे मदद होयो। चेरि जानायजों खि गोर खिनानि जेनानिफ्रायबो रेहाय मोन्नो हागौ।

(3) इमिउनिटिखौ गोखौ खालामो: चेरिआव मेलाटनिन मुनि गुण मोन्नाय जायो, बेयो इमिउनिटिखौ बारायहोनायाव मदद खालामो। चेरिआव भिटांमिन सि आरो एन्टि-अक्सिडेन्टिनि गुण मोन्नाय जायो, जायखौ जानायजों इमिउनिटिआ गोखौ जायो आरो बेरामआव गोखौ जायो।

(4) चेरिआ जिंगानि फाहामथाइ होयो: आधिखालनि करना बोथोरव बयबो जिंगायाव गोखौदों। बेबादि समाव जिंगानि जेनाजों भुगिनांदोब्ला चेरिखौ गावनि डाइटाव लाफानो हागोन। मानोना बेयाव माखासे एरैबादि गुण मोन्नाय जायो, जाय जिंगाखौ जानगार खालामनायाव मदद खालामनो हागौ।

(5) उन्दुनो ओंखारनिफ्राय रेहाय होयो: बेयाव गोबां बिबानि मेलाटनिन मोन्नाय जायो, जाय उन्दुनो ओंखारै जेनानिफ्राय रेहाय होनायावबो मदद खालामो।



# रिय अलिम्पिक आव कटा आवग्रिनो हनाय सन्जिब राजपुत आ थामथि खेब टकिय अलिम्पिक आव बाहागो लागोन

मुनानगर, 22 जुलाई: 2008 आव बेइजिं, बेनि उनाव 2012 नि लन्डन अलिम्पिक आरो 2016 नि रिय अलिम्पिक आव सन्जिब राजपुत आ कटा मोनो हादो मोन, नाथाय बिथानि कटाखौ गुबुन सोरबानोसो होनाय जादो मोन। बेनि उनाव बिथाडा गावनि बोसोरनि नाजानायखौ दै याव नो थांगारनाय मोन्दादो मोन आरो गावखौ बैसो जाबाय होन्नाने फोरमायनायजो लो गोसे सिगां फासे दावगानो हनाय नला बुदो मोन। बे समाव बिनि गोसो आव थाथेरनो हाथै थासारि फेदो मोन। बेबादि थासारिजो सौसिबोनाने बियो गावखो नो गाव गोखोसिन खालामो आरो सिगां फासे वर्ल्ड काप आव




सिल्लार मेडल देरहायो आरो टकिय अलिम्पिकनि थाखायबो क्वालिफाइ जानो हायो। बे खेब आव बिनि जायगायाव रावबो फैयाखै। 40 बोसोरनि

गोखो गेलेगिरि सन्जिब राजपुत आ बे खेब आव थामथि खेब अलिम्पिक आव बादायगोन। सन्जिब राजपुत आ फोरमायदोदि, गावनि जिउनि

मोन्दाथिजो बे खेबनि अलिम्पिक आव मोजाडे नो दिन्थिफुनो नाजागोन आरो बिनि थाखाय हादरनि जानाने मेडल देरहागोननि सायाव

फोथायनाय लानाने जाफुंसागोन। थानाय खेबने अलिम्पिकनि फाइनालाव जायगा आवग्रिनो हायाखै ब्लाबो बे खेब आव बांसिने नाजानायजो फाइनाल बादायनायनि थाखाय गोखोडे नाजागासिनो दड। सन्जिब राजपुतनि बिफा कृष्ण कुमारनि रांखान्थियारि थासारिआ मोजां नडामोन। रांखान्थि थाखाय टेला नारो मोन। सानसेखालि सोरबा सासेआ बिखो रायदो मोन आरो फिसाज्लाखौ बेनि सोलोथाइ होबाय नामा होन्नाने सौंथि खालामदो मोन। बेनि उनिनप्रयनो बिफया फिसाज्लाखौ सोलोथाइ होनायनि थांखि लायो आरो सिगां फासे जौगालाहोनायनि थाखाय सानो ह्यो।

# टकिय अलिम्पिक 2020 नि समाव 5000 ड्रप नमुनाखौ लानाय जागोन



टकिय, 22 जुलाई : आइएसिनि बिबान आ थागोन। आइटेए आरो खेलपंचारनि डपि होबथाग्रा बिफान आ बे केसजो जुजिगोन। कभिड इनफेक्सनजो गोहोम गोग्लैनाय टकिय अलिम्पिक मेचखौ बेखेवनाय फोबोनि समाव दर 15 हादतफोरनि दैदेनगिरिफोरा बाहागो लानो हागौ। जापान सरकारनि गाहाय केबिनेट सेक्रेटारि कात्सुनुबु केटा बुदो,

कभिड-19 इनफेक्सनजो गोहोम गोग्लैनायखौ सामलायनायनि गेजेरजो माहारियारि स्टेडियम आव बेखेवनाय फोबोनि समाव सुबुफोरनि बाहागो लानायखौ सिमा गोनां खालामनो थांखि लादो। केटा बुदो, 70 केबिनेट थाखोनि बिबानगिरिफोराबो जापान आव दावबाय फेनो हागौ।

आइएसिनि बिबान आ थागोन। आइटेए आरो खेलपंचारनि डपि होबथाग्रा बिफान आ बे केसजो जुजिगोन। कभिड इनफेक्सनजो गोहोम गोग्लैनाय टकिय अलिम्पिक मेचखौ बेखेवनाय फोबोनि समाव दर 15 हादतफोरनि दैदेनगिरिफोरा बाहागो लानो हागौ। जापान सरकारनि गाहाय केबिनेट सेक्रेटारि कात्सुनुबु केटा बुदो,

## इयुथ आसार्नि वर्ल्ड कापनि थाखाय साक्षि चौधुरिआ भारतनि जानाने गेलेगोन

गोदान दिल्ली, 22 जुलाई: गाजियाबादिनि साक्षि चौधुरिआ आथिखालाव भारतनि स्टर आसार् दिपिका कुमारिबादि जानो गोसो जादो। साक्षिआ पलेण्ड आव जागायजेनाय वर्ल्ड आसार् सिमियनसिपनि थाखाय सायख जाबाय, जाय फेगो 9-15 आगस्टनि गेजेराव खुंफुं जागोन। कम्पाउन्ड राउन्ड आव साक्षिनि अनगायैबो मंगलपुरिनि आसार् सेन्टारनिफ्राय प्रागति

चौधुरिआबो सायख 'जादो। साक्षिआ गिबि खेबनि थाखाय भारतनि जानाने गावनि रोग्थिखो दिन्थिफुं गोन। बोसोरने सिगां साक्षिनि बिमाया गावनि गहेना फानाने फिसाजोनि थाखाय कम्पाउन्ड राउन्डनि इकुइपमेन्ट बायदो मोन। ट्राइलनि सिगांबो बोरलानि रिलिजार् बायनायाव बिमाया गावनि आस्थामखौ फानो गोनां जादो मोन। बेरफासे बादायलायनायनि थाखाय साक्षिनाव बोरलानि थिरबो गैयामोन, जायनि थाखाय



ट्राइल आव लो गोनिफ्राय दाहार लानानेसो बाहागो लानादो। बिथाडा ट्राइल आव मोजाडे दिन्थिफुंनो हनायजो वर्ल्ड सिमियनसिप आव भारतीय टीमनि जानाने गावनि जायगाखौ आवग्रिनो हायो। साक्षिआ खौरगिरिनि सिगाडव

फोरमायदोदि, गावनि बिफाया गंसे प्राइभेट कम्पानि आव साखि मावो नाथाय महामारि करनानि जाउनाव बेखोबो खोमानाने लानो गोनां जायो। नख 'र आव गावहा बिदा दड। नख 'रनि रांखान्थियारि थासारिआबो नांगोबादि मोजां

नडा। बिथाडा जे ब्ला बोसोरने सिगां आसार्नि सोलो नो लुबैनायनि सिगां बिमानो फोरमायदो मोन अब्ला बिमाया गावनि गहेना फानाने 1 लाख रनि कम्पाउन्ड राउन्डनि थाखाय बोरला बायनाने होफेदो मोन।

## टकिय अलिम्पिक अपेनिं सेरेमनीनि डिरेक्टरखौ बिबाननिफ्राय बोख्नायबाय

गोदान दिल्ली, 22 जुलाई: 23 जुलाईनिफ्राय खुंफुंजानो गोनां टकिय अलिम्पिकनि अपेनिं सेरेमनीनि डिरेक्टर केन्टर कबायाशीखौ बिबाननिफ्राय बोख्नायबाय। बिथांखौ 1998 आव जानाय दाडाबाजिखौ लानाने जंखायनाय कमेन्ट खालामनायखौ लानाने बे थिरांथाखौ लानाय जादो। बावैसो समनि सिगां अपेनिं सेरेमनी आव लानाय सासे देखोगिरियाबो बिबाननिफ्राय बिबान एंगारनाय लाइजाम गथायबाय। मुलुगनि गासै हादरफोरनि गेलेगिरिफोरा टुर्निमेन्ट आव बाहागो लानो थाखाय जापान आव सौहेजोब्याय आरो गावनि गोहोखौ दिन्थिनायनि थाखाय थियारि जाबाय। अलिम्पिक सामलायग्रा कमिटीनि आफादिगिरि सिक हाशिमत आ फोरमायनाय बादिब्ला, अपेनिं सेरेमनीनि डिरेक्टरखौ गावनिनो कमेडि श्व 'नि



समाव दावराव-दावसि जानाय एबा फोजोबसांनाय जाथार्यनि सायाव लानाने खालामनाय जंखायनाय कमेन्ट खालामनायनि जाउनाव बिबाननिफ्राय बोख्नायनायनि थांखिखौ लानाय जायो। कबायाशीनि खालामनाय कमेन्ट आ ससेल मिडिया आव गोबाडेनो भाइरेल जादो जाउनाव अलिम्पिक कमिटी आ बिबाननिफ्राय बोख्नायनो थांखि लादो। महामारि करना भाइरासनि थाखाय बे खेबनि अलिम्पिक सेरेमनी आव दर 15 हादरनि दैदेनगिरिफोरा बाहागो लानो हागौ। सुलुनि बादिब्ला, सेरेमनी आव 1 गेजासे सुबुफोरा बाहागो लागोननि मिजिं खालामदो। फ्रान्सनि हादरगिरि इमानुएल मेक्रान, मंगलियानि गाहाय मन्थि लुबसानामसरइ आयुन एडन आरो आमेरिकानि गिबि आइजो जिल बाइडेननि अनगायैबो माखासे मुलुगयारि दैदेनगिरिफोरा सेरेमनी आव नुजागोननि खोथा होदो।

## टकिय अलिम्पिकनि बेखेवनाय फोबोयाव भारतनिफ्राय सा 44 गेलेगिरिफोरा बाहागो लागोन


गोदान दिल्ली, 22 जुलाई : करना इनफेक्सननि गेजेराव 23 जुलाईनिफ्राय जानो नागिरनाय टकिय अलिम्पिकनि अपेनिं सेरेमनी आव भारतनिफ्राय सा 44 गेलेगिरिफोरा बाहागो लागोन, जेराव सा 6 बिबानगिरिफोराबो सेरेमनी आव बाहागो लागोन। भारतनिफ्राय टकिय अलिम्पिक आव बाहागो लानो थाखाय सा 228 सोद्रोमाफोरा टकिय आव सौहे बाय, जेराव सा 119 गेलेगिरिफोराबो दंफा देरो। अलिम्पिक भिलेज आव माखासे गेलेगिरिफोरा खौ कभिड पजिटिभ मोन्नाय



जाखां बाय, जायनि उनाव सामलायगिरिआ जायखि जाया रोखोमनि जेना गोनां बिबानखौ लानो। जाय गेलेगिरिफोरा हायाखै खानायै सान आव बादायलायगोन, बिसर खौ गिबि आवनो फोबोनिफ्राय

जानगाराव थानो थाखाय बांधा बुंनय जादो। सा 6 बिबानगिरिफोराजो लो गोसे भारतनि सा 50 सोद्रोमा थानाय हान्जाआल 'सेरेमनी आव बाहागो लागोन। भारतीय अलिम्पिक संघनि गाहाय सेक्रेटारि राजिब

मेहे ताआ बुदो, जोनि गेलेगिरिफोराखौ इनफेक्सन जानायनि गिखां होयो गोसो जायाखै। दरफामबो हादतनि सा 6 बिबानगिरिफोरा खौ फोबो आव बाहागो लानो गनायथि होनाय जादो।



सुइमिं फेडोरेसन आ क्वालिफिकेसन जमा खालामनायनि हाबाफारिनि समाव गोरोन्थि खालामदो। सामलायगिरिनि गोरोन्थि जाहोनाव पलेन्ड आव अलिम्पिक नेमखांथिखौ सिफायनाने गनायथि मोन्नाय गेलेगिरिफोराबो बांसिनि मुंखौ थिसन्दो, जायनि उनाव सोर गेलेगिरिफोराखौ नेवसिगारदो। मुंदांखा दै सानसिग्रा काकिया बासिकनि अनगायै पलेन्डनि गासिबो अलिम्पिक दै सानसिफोरा गासै लाइजां आ मुं सायनाने पलेन्ड सुइमार महासंघनि फुरा बर्डखौ बिबान एंगलायनायनि दाबि दैखादो। लाइजामनाव बुदो, पलेन्डनि दै सानसिफोरा, नोगोरारिफोरा आरो दैदेनगिरिफोरा लाजिनांनयनि मैहुर जानादो। बिबानगिरिफोरा नि गोरोन्थिनि बेसेनखौ गेलेगिरिफोरा सुखनादो। बेबादियाव सुइमार फेडोरेसननि बिबानगिरिफोरा सायाव बिजिरनांगो।

## इंग्लेन्ड टीमनि बेटिं खालामग्रा हामिद आ टीम इन्डियानि हेंथायै 100 रान बानायदो

गोदान दिल्ली, 22 जुलाई: भारत आरो इंग्लेन्डनि गेजेराव फेनो गोनां दाननिफ्राय गेलेनो गोनां मोन 5 मेचफोरनि टेस्ट सिरिजनि सिगां खनै बादायलायनायनि थाखाय इंग्लेन्डनि टीमखौ फोसावबाय। बे सिरिजनि सिगां टीमनि इन्डिया आ 3 साननि प्रेक्टिस मेच आव काउन्टी सेलेक्स इलेबेननि हेंथायै गेलेदो।

बे मेच आव गेलेनो नागिरनाय इंग्लिस बेटिं खालामग्रा हसिब हामिदखौ भारतनि हेंथायै गेलेनाय टेस्टनि गिबि मोन्ने मेचनि थाखाय टीम आव सायख 'बाय। टीम आव सायख ' जानायनि उनावनो बियो मोजाडे गेलेनाने फर्म आव थानायनि



फोरमान होदो। भारतीय टीम आ नैथि साननि फुडव गावनि बादायलायनायाव 9 उइकेटनि सायाव 306 रानजो आवगायनो हादो। नाथाय टीम आ 5 रान सरजाबबावनाने 311 रान आवनो थाबथाना थादो। भारतनिफ्राय के एल राहुल आ 101 रान बानायदो, जेराव रविन्द्र जाडेजाया 75 रान बानायदो। काउन्टी एकादशनिफ्राय क्रेग मिल्स आ गोखौ बल खुबैग्रा जादो। इंग्लेननि टेस्ट टीम आव जायगा मोनो हानाय हामिद आ काउन्टी टीमखौ आवगाय होदो। हामिद आ 228 बल आव 12 खेब 4 रान बानायनाने गावनि फास्टक्लास के रियारनि 8 थि सेन्चुरीखौ फुरा खालामदो।